

D E
V A S I S C U T I S
ET INTESTINORUM

A B S O R B E N T I B U S

PLEXIBUSQUE LYMPHATICIS PELVIS HUMANAЕ

ANNOTATIONES ANATOMICAЕ

CUM ICONIBUS

AUCTORE

IOANNE GOTTLOB HAASE

MEDIC. D. ANATOM. ET CHIRURG. IN ACADEMIA LIPSIENSI
PROFESSORE PUBLICO ORDINARIO



LIPSIÆ

APUD IOANNEM FRIDERICUM IUNIUM

MDCCCCLXXXVI.



HISTORICAL

2000

SERENISSIMO
PRINCIPI AC DOMINO
DOMINO
FRIDERICO AUGUSTO
DUCI SAXONIAE
IULIACI CLIVIAE MONTIUM
ANGRIAE ET VESTPHALIAE
SACRI ROMAN. IMPERII ARCHIMARESCHALLO
PRINCIPIQUE ELECTORI
LANDGRAVIO THURINGIAE MARCHIONI MISNIAE ET UTRIUSQUE
LUSATIAE BURGGRAVIO MAGDEBURGICO PRINCIPALIS DIGNI-
TATIS COMITI HENNEBERGAE MARCAE COMITI ET
RAVENSBERGAE BARBIAE DENIQUE ET HANO-
VIAE DOMINO IN RAVENSTEIN
RELL.

SERENISSIME ELECTOR

INDULGENTISSIME DOMINE



Quod nuper SERENISSIME ELECTOR eo huius academiae publico loco, quo corporis humani fabrica spectatur, iisque, qui in tuenda et reparanda hominum sanitate tempus et operam collocare cupiunt, traditur, apparatus praeparatorum anatomicorum colligi eundemque conservari et augeri, haecque cuncta TUIS sumtibus agi iusseris, id vero

beneficium est maxumum et ab omnibus, quibus Deus hoc dedit, ut TE DOMINUM haberent, constantissima et maxime pia memoria recolendum.

Inspiravit haec TANTA TUA LIBERALITAS, QUAM ut tota academia, ita inprimis ea eius pars, cui SAPIENTIA TUA litterarum medicarum studium et curam credidit, admirari et colere satis non potest, animo meo eam cupiditatem, ut summae in TE pietatis sensum mente expromere huncque librum devotissimi animi interpretem ad TE delegare auderem; eoque magis ut hoc agere gestirem, maxima, quibus per TUAM, DOMINE CELSISSIME, INDULGENTIAM egometipse fruor, beneficia me concitarunt.

Nihil est, quod Deum immortalem precari et magis debeam et malim, quam ut TIBI ad tuendam civium, qui in TUA INDULGENTIA summum solatium habent, salutem, vita contingat admodum longaeva et ut DOMUS TUA POTENTISSIMA cuiusvis generis bonis cumulatissima diutissime et longissime emineat

SERENISSIME PRINCEPS

CELSITUDINI TUAE

devotissimus

Ioannes Gottlob Haase.



P R A E F A T I O.

Cum ante quatuor annos compendium neurologicum, quod academicis praelectionibus esset accommodatum, scripsissem multorumque, quorum in manus illud venerat, de meis laboribus iudicium extitisset mihi non parum honorificum, etiam ad aliud genus partium corporis humani scribendi consilium converteram; praesertim cum ad id exequendum ipsa amicorum quorundam voce admonitus essem. Erant igitur quaedam de musculis in promptu, quae in eam orationis formam, qua nervos adumbraveram, redigerentur. Atenimvero posteaquam Dissectorum studium a nervorum doctrina, cui post fructuosissimos labores HALLERI, utriusque MECKELII, P. et F. ut et HUBERI, LOBSTENII, CAMPERI, VRISBERGII, METZGERI, NEUBAUERI, LUDWIGII, P. et F. SOEMERINGII, MAIERI, PROCHASCAE, MALACARNII nonnullorumque discipulorum, quos Celeberrimi Isti Viri e suis dimisere scholis et quos singulos, partim ne brevitatis negligens reperiar, partim quoniam eorum nomina sunt celebratissima, appellare nolo, vel nuperrime MONROUS, SCARPA et WALTERUS, inter quos etiam FONTANA, Vir praeclaro ingenio praeditus, referendus est, cumulum addiderunt, ad vasorum absorbentium genus transiit; studii anatomici amor etiam me in societatem laborum traxit. Quae enim inde a nonnullis maxime annis Anatomicorum, qui NUCKII imprimis vestigia presserunt, ad vasa lymphatica humore replenda et arte oculis exponenda mutua fuerit aemulatio, eo magis laudabilis, quo gravior est naturae et motus eorum, quae in homine vivo iis continentur, fluidorum cognitio, neminem fugit, qui legerit, quae Celeberrimi Viri FR. MECKELIUS, HEWSON, CRUIKSHANK, SHELDON et MASCAGNI, quorum numero etiam WERNERUS cum socio laborum

FELLERO

P R A E F A T I O.

FELLERO addi debet, de hoc vasorum genere exposuerint. Maxime vero animum ad scribendum excitabant experimenta, quae expectationi responderant, et, cum mercurium in ipsa cutis vasa compulerim et globulos eius in eorum absorbentes radices ad corpus reticulare usque coegerim, spem longe superaverant. Facillimum etiam et ad mea vota explenda paratissimum sese praebuit clarissimus FISCHERUS, Professor maxime industrius, qui, cum experimentorum meorum successum vidisset, nec parvam ex iis cepisset voluptatem, operam ultro mihi obtulit et in delineandis acrique incidendis partibus cuncta ad naturam et mentem meam egit ac magno amicitiae officio sibi me obstrinxit.

His ex causis natae sunt illae, quae nunc prodire et quas e variis collegi cadaveribus, annotationes. Reti vasculoso lymphatico cutis descripto de iis vasis, quae a pede extremo e longitudine cruris femorisque ad inguina ascendunt, partim propterea egi, quoniam illa inde a malleolo interno in cadavere, in quo plexus pelvis exploraveram, a me repleta erant, partim etiam hac ex causa, quoniam, quo loco nexum vasorum cutaneorum et subcutaneorum inguinalis regionis cum glandulis ibi positis declararem, eo quoque de truncis, qui e crure et femore ascendunt et in easdem glandulas inferuntur, differere a re non alienum esse credidi; praesertim, cum illos qui ab artubus inferioribus ad inguina porriguntur, profundos aeque ac superficiales mercurio plenos ipse aliquoties viderim et in minoribus vasis, quae a planta et dorso ipsius pedis extremi ascendunt, enarrandis Clarissimi MASCAGNI icones eorum sequi potuerim. Characteres, quibus varios pelvis plexus lymphaticos, qui propter multifariam vasorum et glandularum lymphaticarum complicationem, non facile discernuntur, distinguerem, non aliunde quam a partibus iis proximis petendos esse duxi; et cum maior numerus vasorum pelvis in sinistro latere mercurium suscepisset, ut, quantum fieri posset, cuncta apparerent et plenae luci essent exposita, trunci partes iconi secundae et tertiae insculptas is, qui eas delineavit, inter earum delineationem in sinistrum cadaveris latus inclinavit; in situ partium definiendo situs cadaveris rationem habui. Quam partem ductus thoracici alii receptaculum chyli five cisternam lumbarem dixerunt, eam propterea, quoniam natura sua cum ductu contine-

tur

P R A E F A T I O.

tur et saepe ne amplitudine quidem ab eo distinguitur, principium ductus thoracici appellavi. Cuius per abdomen et thoracem ad normam iconis secundae et tertiae ascensum expositurus cum non ignorarem, viscerum etiam lymphatica vasa ex confluxu multorum nata in eum inferi; eadem ipsa, etsi duabus istis tabulis non repraesentata sint, malui oratione adumbrare, quam partes natura connexas silentio separare. Omnia primae, secundae et tertiae tabulae vasa per duos truncos mercurio replevi, quorum uni in quolibet crure in regione malleoli interni instrumentum Blizardii inferui; axillarium vasorum plexus iconis tertiae a latere interiore ossis humeri brevi infra caput eius intervallo mercurium quinque truncis brachialibus suscepit.

Cum dissertationem *de motu chyli et lymphae glandulisque conglobatis* anno MDCCCLXXVIII a me scriptam cum novis meis experimentis ac laboribus comparassem: in ea alia esse intellexi, quae dilucidius, quam eo tempore, quo eam scribebam, iis nunc illustrari possent, alia vero mutatione et emendatione eo magis egere, quo plura postea non solum a me, sed ab aliis etiam, in hoc doctrinae genere facta sint experimenta. Quam ob causam cum ea, quae illa continentur, natura sua ab argumento meo abesse vix potuerint, locum iis in Sectione huius libri secunda attribui; qua in re ita sum versatus, ut alia, quae non arcto vinculo cum tractatione nec cum arce eius ipsa coniuncta essent, omitterem, alia vero, quae corrigi deberent, mutarem, plurima denique adderem, cuncta vero his, quae nunc edidi, observationibus conformarem. Num medicae disciplinae utilitatis quid ex his laboribus capere possint, id aequo aliorum arbitrio relinquo. Lipsiae kalend. Octobr. ann. MDCCCLXXXVI.

C O N T E N T A.

SECTIO I.

Vasa cutis et intestinorum absorbentia plexusque lymphatici pelvis.

	<i>Cap. I.</i>	
Vasorum lymphaticorum repletio, mercurio facta.		pag. 1
	<i>Cap. II.</i>	
Vasa absorbentia cutis et contextus cellulosi subcutanei.		4
	<i>Cap. III.</i>	
Vasa lymphatica artuum inferiorum.		6
	<i>Cap. IV.</i>	
Plexus lymphatici pelvis.		8
	<i>Cap. V.</i>	
Ductus thoracici per abdomen et thoracem ascensus eiusque in venam subclaviam insertio.		10
	<i>Cap. VI.</i>	
Vasorum absorbentium cutis origo.		13
	<i>Cap. VII.</i>	
Vasa lactea five absorbentia intestinorum.		15

SECTIO II.

D i f f e r t a t i o

de motu chyli et lymphae glandulisque conglobatis.

	§. I.	
Motus chyli in villos intestini.		17
	§. II.	
Vera huius motus causa.		19
	§. III.	
Motus lymphae e cellulis et cavis alius generis in principium vasum lymphaticum.		20
	§. IV.	
Chyli et lymphae per vasa lactea et lymphatica progressus.		22
	§. V.	
Glandularum conglobatarum utilitas.		23
	§. VI.	
Conceditur, praeter utilitatem iam demonstratam aliam esse.		24
	§. VII.	
Obiectiones nonnullae remouentur.		25
	§. VIII.	
Sanguinis et lactis resorptio.		26
	§. IX.	
Puris et ichoris resorptio.		27
	§. X.	
Resorptio impedita.		28
	§. XI.	
Hydrops, resorptionis impeditae symptoma.		29



S E C T I O I.

VASA CUTIS ET INTESTINORUM ABSORBENTIA PLEXUSQUE LYMPHATICI PELVIS.

C A P. I.

Vasorum lymphaticorum repletio, mercurio facta.

Corporis humani duo sunt, quorum munere partes eius continuo mutantur, vasorum genera; alterum lymphaticorum, alterum arteriarum. His vel ea, quae ad eas gignendas, nutriendas conservandasque comparata sunt, iis applicantur, vel illa, quae utilitate carere videntur, limitibus earum exterminantur; illis partim ea, quae in fibris et receptaculis variis continentur, resorbentur, partim ista, quae corpori nondum iuncta sunt, propter particularum autem exiguitatem ei addi iungique possunt, in penetralia eius suscipiuntur. Absorbentium autem fines latissime patere ex veteribus quidem BARTHOLINUS a), RUDBECKIUS b) et NUCKIUS c) inprimis, qui, nisi praemature obiisset, in hoc doctrinae genere anatomen multis praeter illa, quae ei debemus, inventis locupletasset, non ignorarunt; et GALENUS d), quo loco in HIPPOCRATIS dictum: ὅλον τὸ σῶμα εἰσπνοὸν εἶναι, commentatus est, se haud nescivisse ostendit, cute quidquam resorberi et ἐκ τῆ περιέχοντος ἡμᾶς ἀέρος ἐκ ὀλίγην μοιρᾶν poris suscipi: uberior tamen eorum exploratio nostrae aetatis dissectoribus commissa esse videtur; certe multas partes, quas lymphaticis vasis carere antiqua opinio erat, iis instructas esse, et, nec cerebrum nec oculos iis destitui, experimentis recens factis abunde constat e). Enimvero, ut hoc tantum commemorem, ante paucos annos b. HEWSON f) sibi probabile esse scripsit, si sua consulat experimenta, cutanea inguinalis regionis vasa lymphatica a vasis huius generis glandularum inguinalium suscipi, posteaque duo alii clarissimi Viri, CRUIKSHANK g), et

MASCA-

a) *de lacteis thoracis in homine et brutis nuper observatis*, Hafn. 1652.

b) *nova exercitatio ductus aquosus exhibens et vasa glandularum serosa*, Arol. 1653. Disput. de sero eiusque vasis, 1661. Upsal. HALLER. disputat. anatom. Tom. II.

c) *Adenographia et uteri anatome nova*, Lugd. Bat. 1692.

d) *de usu puls.* ABRAH. KAAU. de perspiratione Hippocratica, cap. 9.

e) ALEX. MONRO'S *observations on the structure and functions of the nervous system*, Chap. 5. p. 17. 18. Edinb. 1783. fol.

Vasa cerebri nonnulla lymphatica cl. MASCAGNI in hemisphaeriis eius vidit et mercurio replevit. Sunt satis ampla, prae aliis tamen tenera et rami eorum rete formant. Trunci e ramis nati gyris cere-

bri intercipiuntur; membranam arachnoideam ea cingere scripsit. In canali carotico et foramine iugulari nonnulla eorum mercurio replevit coniuncta cum glandulis in introitu carotidis in canalem petrosam et in loco venae iugularis internae ad finem transversalem durae matris ascendentes positae. Vid. *Prodrome d'un ouvrage sur le système des vaisseaux lymphatiques*, a Sienn. 4. 1784. pag. 44.

f) *Experimental inquiries into the lymphatic System*. Part. 2. cap. 3. p. 23.

g) *Remarks on the absorption of calomel from the internal surface of the mouth; accompanied with a preliminary Sketch on the History and principal Doctrines of Absorption in human bodies*. Lond. 1779. p. 60.

MASCAGNI h) se cutaneos hos canales mercurio replevisse scriptis sunt professi. Quibus lectis, ad systema vasorum lymphaticorum et lacteorum mercurio replendum experimenta capere, et ad teneros hos non solum viscerum, sed cutis etiam et contextus cellulosi, ei proxime subiecti, rivulos diligentius explorandos studium conferre in animum mihi induxi. Cuius suscipiendi laboris cum insigni flagrare cupiditate, fine Januarii mensis proxime praeterlapsae hiemis in theatrum anatomicum varia deferebantur cadavera, quorum unum praecipue mihi aptum videbatur, in quo lymphatica vasa cutis et contextus cellulosi, plexusque lymphaticos abdominis varios diligenter disquirerem. Erat cadaver feminae iunioris, annos viginti natae, cuius corpus, cum oedemate esset affectum, consilio ita erat idoneum, ut experimentorum eventus voto prorsus responderet. Non omnium autem defunctorum corpora huic labori apta esse ii experiuntur, qui in diversis cadaveribus istos canales explorant, et in eos vel tinctum liquorem vel mercurium immittere student. In corporibus, quae magis obesa sunt, quam bene nutrita, parvi sunt et admodum tenues, et in artubus inferioribus aequae, ac superioribus, ita angusti et parvi diametri, ut difficiliter liquore repleantur. Cuius rei causa mihi esse videtur, quod spissi istius et oleosi humoris, qui in cellulis, tum subcutaneis, tum illis, quae viscerum partibus interpositae sunt, parum resorbetur, et quoniam, quod inde sequitur, vasa non multum dilatantur; quibus addi potest, circumiectum adipem haec vasa comprimere. Nam diametrum eorum augeri, lateraque extendi et canales dilatari posse, nisi hoc ex hydropicorum perlustratione certum esset, ipsa mercurio facta repletio probat. Inter meos enim labores hoc mihi saepe accidit, ut quantum haec vasa argento vivo amplificata essent, tantum ea, vel ruptura orta, vel iniectionis instrumento ex orificio remoto, rursus collaberentur et angustarentur. Nec senum corpora praestant. Mihi quidem interdum contigit, ut, si quando ichthyocollam aqua fervida solutam et colore rubro tinctam in mesenterii et intestinorum vasa immiseram, vasorum lacteorum quaedam etiam in senum intestinis mercurio replem. Hac enim anchiresi in intestino ieiuno et ileo arcus lacteorum vasorum, ut puto, cum ob causam solito paullo magis conspectui sese obtulerunt, quod tinctus liquor, in cellulosa effusus, vasa alba et pellucida distinguit. Plerumque tamen vel ita contracta atque collapsa sunt, tum intestinorum lactea, tum viscerum lymphatica, vasa, vel ita induratae glandulae, ut mercurii parum admittant, et infarctae partes longiorem eius progressum intercipient. His praeferuntur corpora macie consumpta, in quibus, cum pinguedinis parum his vasis circumiectum et cellulosa tela admodum tenera et laxa sit, glandulaeque, nisi prorsus obstructae sint, iniectionis mercurii iter non impediunt, facilius conspiciuntur canales et replentur. Omnium praestant hydropica cadavera. Equidem scio in quibusdam eorum viscera varia, hepar nimirum, lienem, uterum pancreasque, obstructa esse, ita ut, quae per has partes transeunt et ab iis ad plexum, vel maiorem truncum, colliguntur, ea quidem, cum duriori visceris parte unita, progressum iniectionis mercurii non admittant longius: ast ex eadem ipsa causa vasa artuum inferiorum et superiorum a lymphâ resorpta dilatantur. Praecipue cutis et contextus cellulosi subiecti tela in iis ita relaxata est, et, quae intra harum partium cellulas haeserunt resorberique vel parcius vel non potuerunt, serosae particulae eiusmodi interstitia fecerunt et

vasa

h) l. c. in praefat. p. 4.

vasa ita dilatarunt, ut mercuriales globuli propius ad cutem accedere et in eius vasa ingredi, vel potius intrudi possint i). Mihi autem eiusmodi cadavere oblato, ut, quae aliquoties mercurius iam in aliis mihi in conspectum produxerat, vasa diligentius observarem, in interno et anteriore parte cruris sinistri cutem proxime ab adiposo panniculo separavi, tum vero contextum cellulosum incidi, ut, si serosus humor hydropicus ex oedematoso crure effluerit, cuiuslibet generis vasa et nervi facile inter se discernerentur; idem in dextro crure egi. Neque signa defunt, quibus hae partes, si ad progressum earum attendas, distinguantur: arteriae enim et venae diameter a superiore versus inferiorem manifesto decrescit, idemque cum nervis fit; decrementum tamen nervorum, minimorum praecipue, minus facile sensu cognoscitur, quam in vasis sanguiferis. Vasa lymphatica, ut mihi in cruribus et brachiis visa sunt, fila longiora referunt, venis saepissime apposita, aequali fere diametro versus glandulas procedentia, tenuia admodum, et, si per intervallum aliquot pollicum a proximis partibus separantur, aliquid glandulosae substantiae iis adiectum est, ita, ut, qui has partes distinguere velit, his signis ab errore sibi cavere possit. Deprehenso igitur eiusmodi lymphatico canale a latere saphenae venae magnae et a parte interiore tendinis tibialis musculi anterioris k), qui, tractum saphenae secutus, ad internam regionem articuli genu ascendebat, illum acutissimo scalpello incidi, eique vitreum cylindrum cavum, cuspidem e chalybe paratam et acutam et diametro vasis aptam vel illam paululum minorem instructam, immisi. Quod autem omnes, qui in hoc partium genere perlustrando allaborarunt, monuere, huncque non unius, sed alterius simul, cuius ministerio explorator utatur, laborem esse, id ipse expertus sum. Nam, si quis vasis anteriorem parietem cuspidem scalpelli acutissima inciderit satisque sibi a pertusione parietis posterioris caverit, oculi a puncto incisionis non divertendi, sed constanter in illud intenti tenendi sunt, iniectionis autem instrumentum e ministri, qui mercurium ei indidit, manu accipiendum, idemque non tremula, sed firma manu applicandum est atque tenendum. In ista vero instrumenti applicatione id maxime agere debemus, ne parietem posteriorem perfodiamus; hoc enim perfosso mercurius vel prorsus non, vel in contextum cellulosum effluit, vasque subest vacuo. Ad haec evitanda instrumentum eadem directione orificio inferui, quae esset vasis ipsius, vel ut angulus vasis et cylindri esset admodum magnus. Quo vero iniectione, cuius effectum tractum vasorum lymphaticorum, Tab. II. incisum, mercurio replevi, ex voto redderetur, pedis sinistri columnam elevavi, effecique ut angulus, inter eam et truncum interceptus, obliquus esset. Hoc facto, et pelvi ab inferiore parte versus thoracem nonnihil elata, tres fere librae mercurii per tubum vitreum sensim et trium horarum spatio in corpus subrepserunt. Non neglecto hoc adiumento et vase eiusmodi in crure supra malleolum electo, longe plura vasa in pelvi totoque abdomine repleti cognovi, quam si quis vas lymphaticum supra glandulas inguinales, etiamsi maius esset, arripuerit. Forte pressio, si vas, a plexibus pelvis paullo magis remotum, seligitur, aequalis et pedetentim aucta et anastomosis cum remotis vasis, causae sunt, propter quas maior canalium copia repleatur et extravasatio

i) Mercurius enim nonnisi motu retrogrado, quem pressio excitavit, in vasa cutanea imitti mihi videtur.

k) Horum truncorum, qui a latere venae sa-

phenae magnae ascendunt, multos clarissimi MASCAGNI tabulae II. figura 2. continet. Is, in quem mercurium immisi, 6. vel 7. fuisse mihi videtur.

fatio non facile oriatur. Lentissimam esse vasorum repletionem non mirabitur is, qui perpenderit, argentum vivum per angustissimos canales glandularum inguinalium, (Tab. I.) deinde illarum, quae in pelvi (Tab. II.) haerent et iliacis vasis ipsique aortae et venae cavae circumiectae sunt, penetrare. Quare etiam initio laboris mercurius facile, si iniectionis tubus vasis orificio recte applicatus fuerit, fluit; ubi vero lentior fieri motus eius in vitreo mercurii conceptaculo incipit, signum est, eum ad glandulas inguinales accessisse, eundemque per earum angustias lente moveri. Augetur motus, si, itinere per has glandularum vias superato, hydrargyri flumen in pelvis plexus delabitur, neque, nisi nimis celer eius sit descensus, verendum est, ne in contextum cellulosum aberrarit. E pelvi vero, modo ea elatius et ita sit posita, ut truncum versus caput declinaveris, mercurius ad plexum hypogastricum (Tab. II. litt. z.) et aortae venaeque cavae plexus glandulosolymphaticos, eosque, qui lumbares sunt et psoae et laterali parti columnae vertebralis interpositi, ob copiam vasorum, quorum alia in glandulas proximas intrant, alia eas praetereunt, citius proserpit. Ni motus iste interrumpatur, sperare licet, iniectum liquorem in ductum thoracicum pervenire, eundemque ad ipsam subclaviam venam usque accedere posse meis experimentis cognovi. Aperto enim, cuius vasa Tab. I. II. III. depicta sunt, cadavere, non tantum venae subclaviae, sed in thorace etiam et abdomine venae sine pari eiusque ramis mercurius inerat, quod facile fieri potuit, cum constet, ex vena subclavia in cavam superiorem, et exinde propter declivem versus iugulum situm in venam sine pari eiusque ramos eum sibi viam parare potuisse. Iucundissimum spectaculum erat, quod minora vasa, quae repletionem raro admittunt, iniecto liquido accessum praeberint. Nam cum, de mercurii copia, quae cadaveri sese insinuaverat, latus, inguinalem regionem, quippe e qua, num huiusmodi experimenta bono cum eventu facta sint, cognosci facile potest, explorarem, non solum vasa lymphatica circa glandulas inguinales et glandulas ipsas liquido iniecto turgere vidi, sed cutis etiam pubem versus subnigra mihi apparuit, et, cum leviter in eam incidissem, in anteriore femoris parte (Tab. I.) vasa, ipsi cuti iuncta, hydrargyro plena offendi. Quibus visis, in sectione administranda operam adhibui, ut modum, quo cutanea lymphatica vasa cum illis, quae sunt in contextu subcutaneo et cum glandulis (Tab. I.) inguinalibus copulata reperirentur, satis accurate explorarem. Quae quidem qua ratione a me facta sint, primum enarrabo, postea de progressu vasorum ab extremo pede per plexus lymphaticos pelvis ad ductum thoracicum agam, nexuque brachialium vasorum axillariumque cum ductu hoc declarato, quasdam de vasis lacteis et rete vasorum lymphaticorum cutis observationes addam. Monendum esse puto, observationes has ex feminino quidem superius commemorato cadavere petitas, attamen cum aliorum defunctorum corporibus, quorum vasa lymphatica vel antea vel postea mercurio repleam, diligenter a me comparatas iisque stabilitas esse.

C A P. II.

Vasa lymphatica cutis et contextus cellulosi subcutanei.

Cutim femoris sinistri sub ligamento Fallopii primum transversim, deinde e longitudine incidi, et, ne vasa subcutanea lymphatica discinderem, eam ab adiposo panniculo introrsum et versus pudendum caute reclinare studui. Quae dum moliebar, nonnulli lymphatici trunci sublimiores et cuti propiores cultro occurrebant, qui

qui ex glandulis inferioribus ad superiores ascendebant l). In his unus (Tab. I. Fig. 2. litt. J.) ita arcte inter panniculum adiposum et cutim ab interiore femoris latere ascendebat, ut cum spatio unius pollicis cum semisse cum cute prorsus unitum cernerem. Miratus hunc arctissimum huius vasis cum cute nexum, scalpello haesi, et, interiore hac cutis superficie, quae hoc vas sibi iunctum continebat, diligentius explorata, duos ramos breves cutaneos, (litt. n. n.) cuti paullo longius insertos, vidi. Quibus conspectis truncum ipsum (J.) inferius a panniculo adiposo resecai, ligavi, et, cute paullulam latius a contextu celluloso sive adiposo separata, tum truncum (J.), tum ramos (litt. n. n.) pressi, istaque enchi-resi id effeci, ut mercurius in lateralia minima discederet effugeretque vasa (litt. v. v.). Hoc facto secare perrexi, cutinque cum nonnullis aliis sublinioribus vasis (litt. l. l.), quae rami trunci subcutanei principis (J.) erant, et communi insertione (litt. λ.) in eum rursus inferebantur, resecai, ita tamen, ut non solum nexus trunci subcutanei cum adiposo contextu, sed insertio etiam in glandulam inguinalem (C.) paullo maiorem, et inguinali regioni propiorem, oculis pateret; apparebant etiam vasa nonnulla contextus cellulosi (litt. μ. δ. ζζ.), quae, ex panniculo adiposo sive contextu celluloso orta, in maiores truncos finiebantur. Interea temporis dum haec agebam, duo, vere cutanea, lymphatica vasa (litt. o. q.) detexi, quae primo pollicem longa erant, pressionis autem vi longiora reddebantur (litt. r. r.), ramulosque monstrabant (litt. e. e. e. e. p. p. p.) eiusmodi, qui in cute altius radicabantur. Vix enim iis (litt. o. q.) conspectis, mercurium pressi, istaque ratione duo ista vascula cum furculis, iis continuis et reticulari forma inter se coniunctis, in conspectum produxi. Rei planius cognoscendae cupidus, cutim et vascula partim validius pressi, partim scalpello vexavi, sed quo diutius id egi, eo magis numerus vasculorum inminuebatur, et in exteriori cutis superficie sive cuticula globuli mercuriales sparsim haerebant. Hinc vascula ista, quae mihi reticularem texturam referre visa sunt (Tab. I. litt. e. c. sq. et p. p. p. et n. n.), absorbentia ipsa esse manifesto intellexi, in qua opinione confirmabar, quoniam cutis, qua vascula continebantur, crassities vix eam, quae est chartae scriptoriae tenuis, aequabat.

Ex his intelligitur, mercurium in cadavere, si propter plenitudinem trunci lymphatici, cum glandulis coniuncti, ei progressuro resistunt, in cutim paullulum ingredi, eundemque, si pressionem adhibueris, in reticularia et absorbentia cutanea lymphatica vasa urgeri posse; esse porro, si rete hepaticum superficiale cum rete cutaneo absorbente conferas, et modum, quo in utroque ista vasa monstrantur, perpendas, magnam horum vasorum texturae similitudinem m): constat enim tam hepatis, quam cutis, vascula reticularia esse, eaque pressionis ope motuque retrogrado mercurii excitato demonstrari. Praeterea etiam inde fluit, ea experimenta in iis esse instituenda, quorum cutis oedematosa sit; nam in his non solum cutis, sed vasa etiam lymphatica, quae partem cutis constituunt, propter copiosi collecti seri resorptionem satis sunt dilatata et ad hoc consilium aptissima. Annon cutis pars, quam inflammatio laxavit, iisdem experimentis erit idonea? certe, si quis cogitet arteriosa vasa propter congestionem sanguinis, venosa vero

ob

l) Haec vasa Cl. MASCAGNI superficialia contextus cellulosi appellavit, l. c.

m) MASCAGNI l. c. Tab. I. fig. 6. WER-

NER et FELLER, *vasorum lacteorum atque lymphaticorum anatomicophysiologicala descriptio*. Lips. 1784. 4. Tab. III.

ob reductionem eius dilatari, et in gravi inflammatione, in qua errore loci sanguis in cellulosa[m] discedit, etiam lymphatica sanguinem resorbere n), hincque ea nimis amplificari posse, tumque cutis telam intumescere; id, quod asseruerim, sponte concedet. Denique quo magis vascula illa cutis minima mihi ob oculos posui, et quo diligentius ea cum truncis, in quos inseruntur, comparavi; eo magis hoc animadvertisse mihi videor, esse radicum eorum ad truncos quibus iungantur aliam, quam arteriolarum et venularum ad maiores, unde enatae erant, truncorum ramos, relationem. Arteriae enim pedetentim, et longo cursus spatio absoluto, gracilescunt, et per multas ramorum series decrescunt; idemque in venas, si oculis eas persequimur, cadere cognoscimus. Vasorum autem lymphaticorum cutaneorum radices breves sunt et ab originis loco non longe remotae iam in paullo ampliores trunculos cum subcutaneis connexos immitti mihi visae sunt; idem etiam de hoc vasorum genere reliquarum partium dici posse existimo. Quorum causam non aliunde, quam a diversa vasorum utilitate repeto. Certum enim est arteriarum multifarias series, quibus rami earum decrescant, cum motum sanguinis intestinum augeant, adeoque globulorum frictionem maiorem reddant, ad secretionem diversorum liquorum perficiendam, efficacissima adiumenta esse. Venae, etsi ramorum suorum unione et divisione ab arteriis quodammodo differant, attamen, cum ad sanguinem reducendum comparatae sint, hancque ob causam cum arteriis in rete vasculoso coniunctae reperiantur, ramorum suorum collectione arterias aemulantur. Atenim vero lymphae vasa, cum unicum resorptionis munus acceperint, ne resorptis humoribus viae angustae longitudo difficilem pariat progressum, nec is resorptione ipsa retardetur, radices habent non longe ab ortu cum trunculis sat magnis coniunctas et in eos per pauciores ramulorum series insertas.

C A P. III.

Vasa lymphatica artuum inferiorum.

Vasa lymphatica tam superiorum quam inferiorum artuum vel superficialia vel profunda sunt; haec inter musculos iuxta arterias venasque, illa extero loco et sub integumentis inveniuntur. Superficialium alia sunt sublimia et cuti adunita, alia musculis propiora. Artuum inferiorum lymphatica superficialia in cute digitorum et plantae pedis extremi tenuissima iam incipiunt, et tum in dorso pedis extremi, tum in laterali interna et externa parte plantae eius, ad altiora se attollunt, truncosque formant, qui partim ab anteriore et posteriore regione, partim ab utroque latere cruris ad genu ascendunt, et inde ab interno latere cruris, praesertim iuxta venam cavam, quam in aliis eius partibus, copiosiores reperiuntur. Magnus eorum confluxus genu versus ab interna eius parte est, quo loco etiam quaedam glandulae interius posita[e] sunt, per quas pars eorum altiora versus sese effert. Super genu ab omni femoris parte inter cutim fasciamque latam, nimirum a posteriore, exteriori et interiori regione anteriorem et non-nihil interiorem partem versus magnus eorum numerus colligitur. Decem, sedecim, pluresque admodum magni et longi ibi inveniuntur trunci ex inferioribus

n) Cl. MASCAGNI vasa lymphatica partium, quas inflammatio occupaverat, lymphas sanguinolenta plena et glandulas con-

globatas, quorum illa intrarunt, ceteris magis rubras vidit, l. c. p. 6. Cel. KRUIKSHANK's remarks etc. p. 26.

bus nati; decem circiter in cadavere, cuius femorum superior pars cum pelvi Icone II. expressa est, reperi; longe plures, si MASCAGNI icones spectamus o), numerari posse non dubito. In eo, quod ab extremo pede usque ad femoris summam partem legunt, itinere, pinguedine cincti ac involuti, quibusdam etiam locis ita cum ea coniuncti sunt, ut cellulosam pinguem telam iis non contiguam, sed per continuas fibras et canales prorsus iunctam esse manifesto videamus. Hinc patet, partem ramorum ex ipso contextu pingui incipere et per pinguedinem ad truncos, quibus se iungant, ascendere. Haec vasa contextus cellulosi subcutanea (Tab. I. fig. 2. litt. J. d. μ. zz.) appello. Praeterea frequentior etiam quibusdam locis et talis eorum anastomosis est isque progressus, ut vasis lymphatici truncus modo in duos dividatur ramos ascendentes, qui vel aliis truncis inferuntur, vel, ubi per intervallum sese promoverint, in simplicem rursus confluunt (Tab. I. II.). Quemadmodum igitur in omnibus vasorum generibus motus et progressus frequentissima anastomosi adiuvantur, ita etiam, ut lymphae motus liberior et minus difficilis esset, iam in femoribus aequae ac brachiis rivuli lymphatici frequenter sunt iuncti (Tab. II. III.); qua de re certi reddimur, si glandulas inguinales exploramus. Ad eas enim omne horum vasorum superficialium non rara anastomosi connexorum agmen colligitur ita, ut non solum ea, quae cuti propiora sunt, sed ista etiam, quae profundius in adiposo panniculo latent (Tab. I. fig. 2. litt. g. Tab. II. litt. c. c. c.), et fasciae, musculisque, qui ea teguntur, vicina sunt p), ad glandularum inguinalium inferioram oram appropinquent, easque aucto volumine intrent, in quibus in longe minores ramos dividuntur, quo facto in maiores truncos uniuntur, qui ad alias glandulas, ligamento FALLOPII appositas, diriguntur (Tab. II. litt. b. b. b.). Eo loco cum duplicis generis aliis lymphaticis societatem ineunt ea, quae a femore ascendunt. Quaedam enim a pube, scroto et pene, nec non a labiis pudendi muliebris et cute inguinali ad anteriorem regionem femoris versus vasa sanguifera cruralia se deflectunt (Tab. I. fig. 2. litt. q. Tab. II.), alia, eademque profunda ex musculis cum cruralibus vasis se extollunt, et, cum superficialibus iuncta, glandulas inguinales duas, tres, pluresque ut plurimum annulo abdominali affidentes, adeunt (Tab. II. ***). Neque vero trunci omnes, qui e longitudine femoris ascendunt, istas glandulas intrant, sed quidam eorum eas praetereunt, ut ad glandulas, ligamentoso margini muscoli obliqui externi, qui FALLOPII ligamentum appellatur, adfitas, dirigantur (Tab. II.). Hac autem, etiamsi ex voto successerit iniectio, saepius tamen non in omnia compagis suae vasa lymphatica mercurium admittunt, sed fieri solet, ut una earum dimidia pars truncis plenis mercurio reperiatur referta, altera iis prorsus vacua; unde colligitur, eas plexus vasorum lymphaticorum esse, quibus vasa alius liquidi sint intermixta; quae opinio etiam inde confirmatur, quoniam in nonnullis earum a vena saphena magna ramum iis insertum aliquoties vidi, per medias mercurii strias inductum. Proxime infra ligamentum FALLOPII trunci vasculosi, glandulis egressi, fasciam latam, quae margini ligamenti per fibras aponeuroticas obliqui externi muscoli continuatur, perforant, et, cum profundis iuncta, in abdomen ingrediuntur, ubi in duplicis generis vasa dividuntur. Quorum alia, quae interna dici possunt, in latere interno venae iliacae externae alias, pelvi propiores, glandulas intrant (Tab. II.

o) l. c. Tab. 2.

p) Sunt semiprofunda apud Cl. MASCAGNI.

(Tab. II. litt. h. k.), et deinde in loco coniunctionis rami ascendentis ossis pubis cum osse iliûm in pelvim profundiorẽ demittuntur; alia, eademque ipsa a glandulis ligamento abdominali extero loco adiectis exorta et externa dicta (litt. i.), super arteriam iliacam externam ita ad pelvim flectuntur, ut hanc arteriam cingant, fere prorsus, et iuxta eam, partim ab interno eius latere paullisper in pelvim inclinentur et cum internis, pelvim profundius ingressis, anastomosi iungantur (Tab. II. litt. n.), partim vero ab externo latere huius arteriae iliacae inter eam ipsam et internum latus musculi psoae, cuius internam oram tegunt, plexuosa versus lumbarium vertebrarum corpora et latera efferantur (Tab. II. litt. x.).

C A P. IV.

Plexus lymphatici pelvis.

Quo magis autem omnes pelvis partes, vinculis suis connexas, intueor, earundemque in diversis angulis sedem ob oculos mihi pono, eo magis mihi persuadeo, in nervis et lymphaticis vasis cum aliis et eiusmodi partibus, quae loco situque differunt, connectendis naturam eandem secutam esse legem. Si quis animadverterit, plexus nervorum iis locis, e quibus ad diversas diffitasque partes rami discedant, collocatos esse; sponte intelliget, hoc anastomoscos genus id habere utilitatis, ut nervi cum partibus, loco et sede diversis, commode et tuto coniungantur. Errore decipi mihi non videor, si de plexibus lymphaticis, praesertim iis, qui in pelvi sunt, idem sentiam. Horum enim beneficio fit, ut a diversis partibus in unum, tanquam omnibus communem, locum trunci colligantur et suscipiantur, unde, maiores facti, ad alios plexus et glandulas tuto promoveantur. Praeterea et hoc valet, frequentem hanc vasorum huius modi anastomosin ad avertendam lymphae resorptae stasin motumque eius adiuvandum insignem vim habere. Dilatari enim ea posse, immo rumpi prorsus, si, veluti in obstructo viscere, limpidò lymphatico latici obex ponatur, ipsa eorum fabrica quemque docet et feri in hydropicis effusio, comprobat. Nam etsi negare nolo, in asciticis serum magis ob impeditam resorptionem, quam aliam causam in infimo ventre colligi posse q), nescio tamen, annon etiam ruptura lymphaticorum vasorum in vitii societatem vocanda sit? Denique et hoc assero, esse praecipuam effectorum plexuum causam, ut ad glandulas confertim et commode colligantur et lymphæ in glandulis mutetur. Nam quo diutius mente mecum reputo, quanta sit inde ab inguine per pelvim ad eum usque locum, quo ductus thoracici collocatur principium, glandularum lymphaticarum series, et quis vasorum colli et brachiorum ad ductum Bartholinianum, ad quem non nisi glandularum interventu admittuntur, accessus; eo facilius mihi persuadeo, has glandulas, ut lymphæ in iis mutetur, lymphaticis vasis interiectas esse, quibus ad glandulas per plexus facilis sit accessus. Horum autem plexuum quinque imprimis, si meis uti licet experimentis, numero, quorum primum obturatorium (Tab. II. litt. n.) commemoro. Constat vasis maioribus, quae glandulas, vasis obturatorii sanguiferis nervoque cognomini circumpositas, nunc intrant, nunc iis rursus egrediuntur, ut sese aliis insinuent, quae a latere interno arteriae iliacae

cae

q) Cl. LEONHARDI dissertat. de class. de resorptione praeter naturam impedita, Lips. 1771.

cae externae descendunt (litt. l.). Nascitur a vasis, quae a glandulis internis, sive spinae ossis pubis proximis, in pelvim descendunt et fere medio loco pelvis verae sive propriae a latere interiore nervi obturatorii plexum magnum effingunt, quem augent trunci lymphatici, qui ab exterioribus glandulis (litt. b. b.) ligamenti FALLOPIANI super arteriam iliacam externam in pelvim deflectuntur. Cum contextum eius diligenter disquirerem, vidi ex iis, quae inter arteriam iliacam externam et psoam intersunt et in harum partium interstitio peculiarem plexum conficiunt, vasis (Tab. III. fig. II.) quaedam etiam ab exteriori latere arteriae et venae obturatoriae nervique in eum plexum intricari, et ob mutuam internorum et externorum lymphaticorum truncorum anastomosin non solum iliaca, sed obturatoria etiam vasa ansa lymphatica cingi. Secundus plexus ischiadicus est, ob ischiadicam incisuram magnam, cui appositus est, ita dictus (Tab. II. litt. q.). Nimirum ex plexu obtutorio a latere interno arteriae obturatoriae nervique nonnulli, ut mihi visi sunt, non parvi trunci in telam glandulosocellulosam, quae intestino recto et vaginae uteri, in viris autem vesicae urinae, vesiculis feminalibus, vasisque deferentibus proxima iisque intertexta est, profundè versus spinam ossis ischii demittuntur, qui a latere interiore musculi pyriformis nervorumque sacralium, imprimis tertii, quarti, quintique, cum aliis lymphaticis, quae posteriore loco a glutaeis musculis per magnam incisuram ischiadicam in pelvim ingrediuntur, coniunguntur. Ex utroque hoc plexu vasa emergunt, quae ab interno latere arteriae hypogastricae et arteriae pudendae communis in tres quatuorve truncos colliguntur, qui partim iuxta arteriam hypogastricam et iliacam communem ad lumbares glandulas, partim ad locum bifurcationis maiorum vasorum attolluntur et cum illis oppositi lateris anastomosi connectuntur (Tab. II. litt. u. v.). Tertius plexus iliacus internus est, quem arteria iliacae externa et hypogastrica intercipiunt (Tab. II. litt. w. w.). Nam vena iliacae externa ab interiore et inferiore veraeque pelvi propiore loco maxima ex parte plexu tegitur, ad quem componendum praeter ea, quae ex pelvi ab ischiadico ascendunt, decem, immo duodecim, vasa a glandulis, annulo abdominali proximis, colliguntur. Ista vero a vasis nascuntur, quae iuxta arteriam iliacam externam a glandulis inguinalibus (litt. b. b. b. b. b.) oriuntur et proximas glandulas ingrediuntur (litt. m. m.). Iliaci externi, qui quartus est, locum inter arteriam venamque iliacam externam et psoam invenimus, isque ab iugine usque ad synchondrosin ossis sacri ossisque iliū pertinet, vasis iliacis adglutinatus (Tab. III. Fig. 2.). Scilicet vasa lymphatica externa, dum in pelvi arteriae et venae iliacae occurrunt et utramque cingunt, triplici cursu proficiscuntur. Alia eorum introrsum trans arteriam iliacam externam venamque ad internos et modo descriptos plexus flectuntur (Tab. II. Fig. 2. litt. l.), alia recta versus angulum sacroiliacum pelvis attolluntur (litt. y. et Tab. III. litt. d. d.), alia denique extrorsum trans arteriam iliacam externam et venam similis nominis ad hiatum, qui psoa et his vasis intercipitur, descendunt (Tab. III. litt. f.), et fociis ibi assumtis iis vasis, quae ex pelvi infra venam iliacam externam ex plexu obtutorio et ischiadico ascendunt, plexum longum effingunt; unde nonnulli trunci lymphatici ad spinam dorsi emergunt, quorum alii lumbares glandulas adeunt (litt. i.), alii sub iliacis vasis transverso fere cursu ad ossis sacri superiorem partem diriguntur (Tab. II. litt. β.), ut quintum pelvis five

hypogastricum plexum forment. Is in loco bifurcationis vasorum maiorum, aortae scilicet et venae cavae, reperitur, et vasa, tam ab iliaco externo, quam interno, in eum intromissa cernuntur. Cum vasa eius iis, quae in introitu pelvis inveniuntur, maiora sint, intelligimus ea, quo ductui thoracico fiant propiora, eo ampliora reddi. Cuncta enim huius plexus in duos, tres, quatuorve truncos confluunt, qui ante truncum aortae divisae venaeque cavae ascendunt et plexuosa tela cum glandulis, ante aortam et venam cavam reperiendis, copulantur. Ad eum locum omnia plexuum hactenus descriptorum vasa e pelvi emergunt ita, ut exteriora lombares glandulas, interiora vero illas, quibus aorta et vena cava inde a pelvi usque ad originem arteriae mesaraicae magnae oblitae cernuntur, et quas confertim ibi positas (Tab. II. litt. 9. 9.) intelliges, pervadant. Ex iis, circum arteriam mesaraicam magnam dispositis, glandulis, earumque plexuosa tela, ipsi NUCKIO non ignota r), et ab Ill. HAL- LERO uberius descripta s), in dextro latere unum duosve truncos nasci vidi (Tab. II. litt. 1. 1.), qui, cum lacteis magnis intestinorum et lymphaticis, quae a visceribus, nimirum hepate, rene aliisque proficiscuntur, coniuncti eorumque accessu aucti, inter venam cavam inferiorem et aortam principio ductus thoracici a latere interno cruris dextri diaphragmatis inferebantur t). Praeterea a glandulis lumbaribus, vasisque quae eas perreptant, in quolibet latere duo, in dextro sub vena cava, in sinistro sub aorta, ductui thoracico ante corpus duodecimae vertebrae dorsalis, vel paullo superius, insinuantur, quorum accessu is canalis non parum incrementi capit (litt. 2. 2.).

C A P. V.

Ductus thoracici per abdomen et thoracem progressus eiusque in venam subclaviam insertio.

Plexus a me descripti, etiamsi intestinum rectum et vesica urinaria cum partibus genitalibus internis e sede dimota et exsecta sint, facile demonstrantur et conservantur. Atenimvero, si quis post bene factam vasorum, quae a superiore femoris parte pelvim intrant, repletionem peritoneum a musculo iliaco interno, nervo crurali iisque nervorum lumbarium ramis, qui ante psoam et ab interno eius latere ad marginem iliopuberalem demittuntur, a psoa et vesica urinaria interiora versus separaverit, praetereaque hanc membranam reclinando, funiculum spermaticum et renum membranam adiposam sollicite et ita a peritoneo distenderit, ut etiam latera intestini recti et vaginae uteri in femina cum contextu celluloso, quo hae partes circumdatae sunt, appareant ac perlustrari possint; alia eaque copiosissima occurrunt vasa, non minus iis, quae commemorata sunt, plexibus et glandulis irretita. Horum ea, quae a vesica urinaria et intestino recto, eorumque inprimis lateribus, et in femina a vagina uteri, originem habent, magna ex parte in plexum obturatorium, ischiadicum, et iliacum internum inferi, etiam mea me docuerunt experimenta. Vasa contextus cellulosi cutis abdominalis et peritonei e regione iliaca ad annulum et ligamentum FALLOPII a latere arteriae circumflexae ilium

r) *Adenograph.*

s) *Element. physiol.* tom. I.

t) *Icon.* II.

lium u) et epigastricae deflecti et glandulis ibi positis irretiri, observatio est, quae Clarissimum MASCAGNI autorem habet x). Ne vero consilii mei limites excedam, in his describendis uberius esse nolo, ea sola enarraturus, quae mihi ex meis experimentis et observationibus innotuerunt. Quae cum ita sint, ductum thoracicum eiusque ex abdomine ad thoracem progressum et insertionem in venam subclaviam persequar, huiusque canalis cum visceribus abdominalibus et thoracicis, cum de eo Cl. MASCAGNI uberrime exposuerit, nexum leviter attingam. Vasa testis cum sanguiferis et vase deferente vaginali tunica inclusa sunt, eorumque, si ea cum cremastere distenta est, duo triaue magna cernuntur, quae, posteaquam per anulum in abdomen sunt ingressa, iuxta chordam spermaticam a tergo peritonei in glandulas et plexus lumbares, et ex iis in ductum thoracicum finiuntur; vasa uteri ab utraque eius superficie ad ligamenta lata coguntur, unde iuxta spermatica vasa per lumbares plexus thoracico ductui insinuantur et in gravidis, quam in aliis, ampliora inveniuntur. Quae renis sunt et lienis, in latere sinistro ab his visceribus inter sua vasa sanguifera versus ductum thoracicum ita decurrunt, ut renalia quidem, cum spermaticis iuncta, lumbari plexui intricentur, lienalia vero sub pancreate in thoracicum canalem ingrediantur iuncta ibi cum pancreaticis et hepaticis. Eodem fere modo in dextro latere inter duodenum et renalia sanguifera vasa magnus plexus ab hepaticis, renalibus et atrabilaris constituitur. Coniuncta haec vasa cum nonnullis truncis lymphaticis intestinorum, qui circum arteriam mesaraicam et mesaraicis glandulis prodeunt, uniuntur et, tum ante, tum post venam cavam, thoracico ductui annectuntur. Superficialia concavae hepatis superficiei inde a margine acuto huius visceris ab utroque lobo a latere vesiculae felleae maxima ex parte colliguntur, et, capsula GLISSONII cincta, per varias glandulas collo vesiculae felleae et ductui choledochi appositae, transeunt, in quo itinere cum profundis et superficialibus lobuli SPIGELII coniunguntur, unde ad ductum thoracicum a tergo duodeni descendant; quae lobi sinistri sunt, horum pars ad curvaturam ventriculi dirigitur, glandulas quasdam ibi collocatas pervadit et, cum quibusdam vasis ventriculi coniuncta, ductui thoracico iungitur. Inter superficialia convexae superficiei alia a lobo dextro, alia a sinistro versus ligamentum suspensorium ascendunt, GÜNZIO iam nota y), in quo in tres quatuorve truncos colliguntur, quorum superiores post processum ensiformem pectus intrant, et, posteaquam glandulas, diaphragmati impositas z), pervaserunt, inter laminae mediastini versus sinistram latus pectoris ascendunt, et, assumtis vasis cordis et thymi, in ductum thoracicum vel vas lymphaticum brachiale sinistram inferuntur, inferiores, perforato diaphragmate e longitudine costae ultimae et a latere venae cavae, in pectus ascendentis, ad thoracicum ductum in regione undecimae vertebrae dorsalis accessum sibi parant; reliqua vasa partim inter oesophagum et venam cavam inferiorem eundem ductum intrant, iuncta cum nonnullis pulmonalibus, partim vero per glandulas curvaturae ventriculi parvae transeunt, et, iuncta cum lienalibus et pancreaticis glandularum,

u) HALLER. *icon. arter.* fascic. IV. tab. I.

x) l. c.

y) Progr. *de hepate.* Lips. 1748.

z) Duas glandulas diaphragmati ante pericardium insidentes aliquoties vidi mercurio repletas per vasa superficialia hepatica.

dularum, iis interpositarum, auxilio ad ductum principem lymphaticum sive thoracicum colliguntur.

Pulmonum vasa lymphatica superiore hieme aliquoties mercurio replevi. Magni eorum trunci sulcis, quibus in utroque latere cuiuslibet pulmonis lobi distinguuntur, interpositi sunt et sub membrana pulmonum ab ambitu visceris exterioris interstitium versus, a pleura ante vertebralem columnam dorsi formatum, proserpunt. Non minora sunt illa vasa, quae ab ambitu pulmonis inferioris et exterioris sub membrana eius ad ligamentum inferius, quo is cum diaphragmate et vertebrae dorsales inferioribus convincitur, reperiuntur. In ea plica, praesertim si ea inde a vertebrae dorsi et oesophagi fede ad pulmonis lobum inferiorem et extrorsum paullulum tensa sit, eorum vasorum magna cernitur copia, quae ab isto lobo in oesophagi glandulas intrant quorumque pars cum truncis illis, qui a superficie convexa hepatis ad dictas glandulas ascendunt, copulatur. At si quis pulmonem a pericardio extrorsum reclinet, et postea eundem antrorsum revolvat, ut ab omni parte nexum arteriae venarumque pulmonalium ob oculos habeat; intelliget, a superiore et media pulmonis parte nasci multos et in his non parvos truncos, quorum alii glandulas nigras, anterieus et posterius oesophago appositas, intrant, et ante pulmonalia sanguifera vasa et bronchia circum oesophagum ad ductum flectuntur, alii iidemque superiores, ubi glandulas bronchiales ante et post bronchos penetrarint, ab omni tracheae parte ascendunt. Isti superiores trunci ubi tum ante tum post tracheam cum iis oppositi lateris reticularem plexum fecerint, maxima ex parte ad iugulares inferiores glandulas accedunt, unde versus axillares et ductum thoracicum diriguntur. Haec cuncta iconibus, in quibus vasa ista mercurio repleta repraesentantur, illustrare possem, nisi eas alii occasione, quam ex instituto de iis agere, reservare maluissim. Vasa lymphatica cordis in corde non admodum pingui visui quidem exposita sunt eaque Cl. CRUIKSHANK et Cl. MASCAGNI replerunt; exploratio tamen eorum atque repletio non parum laboris exigunt. Semel mihi contigit, ut in ventriculi dextri exterioris et anterioris parte per orificium eiusmodi vasis, a me aperti, aerem inflarem, quo facto rete horum vasorum sub exterioris cordis membrana aere tumidum mihi apparebat, cuius areolas vidi esse minimas. Trunci eorum ascendunt, et, cum pulmonalibus iuncti, cum iis, qui tractum arteriae mammae internae sequuntur, ductui thoracico immittuntur.

Hi sunt rivuli lymphatici meis experimentis visi, quorum in unum cavum confluxu communis lymphae et chyli natus canalis inde a vertebra lumbari secunda et prima per abdomen et thoracem ad locum insertionis dirigitur. Huius autem ascendentis non in omnibus eadem ratio est. Modo enim eius fere eadem per totum columnae vertebrae thoracis tractum est amplitudo, et mercurius facile modo deorsum, modo sursum, prouti truncus cadaveris inclinatur, decurrit; modo varia et in isto, quod icone nostra repraesentatur, exemplo tria offenduntur loca, quibus insularis eius est divisio et unio (Tab. III.); modo in quibusdam locis quasi circa se ipse replicatur, in omnibus tamen, in quibus eum disquisivi, cadaveribus inter oesophagum et venam sine pari fere paullulum dextro latere corporum vertebrae dorsales ascendit, ante corpus vertebrae dorsalis tertiae post aortam sinistrorsum sese flectebat et leviter curvus et versus ganglion

ganglion thoracicum magnum convexus inter hoc ganglion et arteriam subclaviam, ante costae primae partem, cum vertebra coniunctam, cui per pleuram annectitur, a pectore emergebat, factoque ibi arcu, a posteriore ad anteriorem partem in venam, vulgo subclaviam, in eo angulo, qui vena iugulari externa et subclavia intercipitur, inclinatur (Tab. III. fig. i. litt. h.). In-fertio autem in venam vel simplici, vel duplici, loco fit, et brevi ante inser-tionis locum ad canalem thoracicum ipsum rami ex iugularibus et axillaribus nonnulli maiores confluunt. Inter pectoralem enim et latissimi dorsi tendinem glandulae axillares magnum plexum brachialium vasorum lymphaticorum super-ficialium et profundorum, quorum utraque maxime ab interiore brachii parte ascenderunt, suscipiunt (litt. m. m. m. m. m.), unde efferentia vasa alias glandulas intrant, quae in cadavere, unde icon petita est, duobus truncis in ductum thoracicum finiebantur (litt. o.).

C A P. VI.

Vasorum absorbentium cutis origo.

Ad alia transeo, quorum causa non parva est inter anatomicos disputatio. Cum nimirum Cap. III. cutanea lymphatica vasa in truncos colligi, quos primum contextum cellulosum intrare et postea, assumtis in eo aliis lymphati-cis, in proximas glandulas inferi, Tab. I. demonstraverim; non dubito, haec ipsa, Tab. I. depicta, vasa absorbentia ista esse, quibus subtiliores particulae resorberi corporique insinuari soleant. Quam resorptionem ut in omnibus corporis locis, sic in cute locum habere et lymphaticis attribuendam esse, ita demonstratum esse scimus, ut argumenta, quippe ab aliis ad eam rem proban-dam collecta, repetere nolim, addendum tamen hoc censeam, alia ex cutis tela ipsa incipere, aliorum vero ortum ab exterioribus limitibus esse peten-dum. Quaestio vero movetur, undenam prima exteriorum vasorum inhalan-tium sive absorbentium cutis lymphaticorum origo sit derivanda? ad quam dis-solvendam opus est, ut ab ipsa cutis, late sic dictae, fabrica disputationis prin-cipium petamus. Si cuti vesicatorium imponitur, vel cutis maceratione solvitur, vel coctione emollitur; attollitur ex ea pellicula tenuis, quae epidermis est, et ab exteriori parte laevis cernitur, ab interna vero strias, quae rete formant, monstrat. Hoc rete membranulam esse, ab exteriori epidermide diversam, aethiopum cutis probat, quae, si commemoratis experimentis disquiritur, epidermidem habet, cui nigrum illud rete, ab epidermide diversum, subie-ctum est. Cel. MECKELIUS cognovit illud ipsum duplici parte constare, alte-ra, solidiore, altera, quae mucum refert et quae idem est, quod LIEUTAUD corpus mucosum dixit. Cum particulam cutis aethiopis disquisivissem, ipse vidi, nigri reticularis corporis partem solidiorem magis epidermidi, quam cuti adhaerere fluidamque nigram aequae cuti ac cuticulae adglutinari. Si epi-dermis cum reticulari membrana separatur, triplicis generis vaginulae sive pro-cessus ad cutim demerguntur. Quarum vaginularum aliae iis locis manifestae sunt, quibus pili reperiuntur, quorum bulbi iis includuntur et poris sese pro-dunt, si pili evulsi sunt a); aliae folliculi sunt glandularum sebacearum, quae circa

a) LUDWIG. dissertat. de humore cutim inungente, Lips. 1748.

circa mammas, labia oris, aures nonnullasque alias partes inveniuntur b); aliae denique non minus ac illae cuti, minus tamen profunde, inferuntur, quae villis sive papillulis cutaneis adhaerent c). Hinc triplicis generis pori in cuticula sunt ponendi, quorum alii ad vaginas pilorum, alii ad folliculos glandularum pertinent et denique ultimi isti sunt, per quos perspirabilis materia efflatur et tenues particulae reabsorbentur. Hi vero, qui perspirationis et inhalationis operi dicati sunt, in cuticula, etiam si microscopio perlustrantur, oculis quidem, fortassis quoniam ob progressum vasorum obliquum etiam horum pororum situs obliquus esse potest, detegi nequeunt, eos tamen vere adesse perspiratio et resorptio manifesto docent, eoque argumento etiam Cl. CRUIKSHANK, qui de iis fusius egit d), utitur, nec Ill. HALLERUS dissentire videtur e). Iam vero non epidermis tantum, sed corpus reticulare etiam sive epidermidis interior lamina vaginam in cutem immittit, inclusam illa, quae epidermidis est. Series eiusmodi vaginarum compositarum iis locis, in quae copiosa cadit exhalatio et inhalatio, potissimum in vola manus, inguinibus et axillis facile deteguntur. Ad eiusmodi vaginam poros hiare vasorum exhalantium et inhalantium facile cum Cl. CRUIKSHANK ipse existimarim, ita ut quidquid vasorum orificiis proximum sit, id si perspiretur, per porum cuticulæ exterminetur, vel, si resorbeatur, per eundem attrahatur et orificio inhalantis vasis intra vaginulam corporis reticularis applicetur. Extremas igitur horum vasorum partes in confiniis cutis et corporis reticularis MALPIGHII ita pono, ut ea sorbentibus osculis a reticulari membranula epidermidis incipiant. Quod si enim sanguifera vasa cadaveris infantis tenui liquore, oleo nimirum therebinthinae, vel ichthyocolla aqua fervida soluta et cinnabari tincta, replentur, et a cute epidermis et a labiis epithelion detrahitur; villi, sive longiores papillulae, erecti apparent, quo facto inprimis labiorum oris pori inhalantes, si microscopio utamur, nobis sub visum cadunt, veluti id nuper egregia icône, quam ob rerum tractandarum connexionem observationibus meis adiunxi f), Cél. CLARE comprobavit g). Iam vero hae radices extremae e papillulis, et nonnullis locis ex villis, cutaneis extremis natae cum aliis radicibus, quae ex cutis ipsius stratis oriuntur, confluunt et in trunculos cutaneos (Tab. I. Fig. 2. litt. r. r. n. n.) coeunt, unde maiora cutanea vasa (litt. o. q.) nascuntur, quae truncis subcutaneis (litt. J. m. l.) et in sublimi contextu celluloso subcutaneo positae suscipiuntur. Haec ictero mihi non parum illustrari videntur. Si bilis ad intestina non admittitur, sed retinetur; resorbetur illa et resorptus humor partim lotio, partim salivae, partim humoribus ad cutem movendis admiscetur. Biliosas quasdam particulas etiam ad corpus reticulare delatas esse, quas ibi errore loci haerere et cutem colore alieno inquinare, flavus ictericorum color haud dubie edocet; praesertim cum aethiopum exemplo constet, causam diversi coloris cor-

poris

b) *ibid.* MORGAGNI *adversar. anatomic.* I.

c) processus istos in cute elephantis, pollicem interdum longos esse Cl. CRUIKSHANK. l. c. asserit, p. 63.

d) l. c.

e) *Elementor. physiol.* tom. 5. *epidermis*, inquit, *undique humore interdum madescit,*

qui per poros plerumque inconspicuos eius penetrat, p. 45.

f) Tab. I. fig. 1.

g) *a new and easy method of curing the lues venerea by the introduction of Mercury into the system through the orifices of the absorbent Vessels etc.* edit. 3. Lond. 1780. S. p. 52.

poris externi in corpore reticulari positam esse. Iam vero si, adhibitis auxiliis, bili ad duodenum itineris libertas restituta est; sensim colore illo flavo deleto, is qui naturalis est, redit. Quam salutarem coloris mutationem ab osculis vasorum resorbentium cutis repeto, quae biliosas particulas, alia via e sanguine excernendas, e reticulari membrana resorpservunt.

C A P. VII.

Vasa lactea sive absorbentia intestinorum.

Quemadmodum vasa absorbentia cutis sub cuticula in corpore reticulari et vaginula ab eodem et epidermide formata, ita vasa lactea ab ampullula originem capiunt intestini, quam in illius cavo esse iniectiones a LIEBERKÜHNIO factae demonstrare dicuntur h). HEWSON quidem, quem alio loco ipse secutus sum i), inhalantia cutis et intestinorum vascula principio differre non statuit, cum suis experimentis nullam invenerit ampullulam k); at, cum Cl. SHELDON l) et CRUIKSHANK m) periculis, solertissime factis et ad hunc finem accommodatis, LIEBERKÜHNIANA asserta stabiliverint et confirmarint, lacteorum principium cum Clarissimis Viris a cavo membranaceo ex villosa tunica intestini deducendum esse puto. Quanquam vero, si originem spectes, cutis et intestinorum inhalantia vascula inter se differunt; attamen, si eorum anastomosis nobis ob oculos ponimus, utraque quodammodo inter se convenire et rete formare cognoscimus (Tab. I.). Liceat autem mihi, cum etiam ad haec exploranda meum contulerim laborem, eorum ex intestinis ad ductum thoracicum progressum ex meis repetere experimentis; nam, cum non lactea tantum mercurio, sed arterias etiam venasque intestinorum et mesenterii cera replerim; omnium horum vasorum decursum per mesenterium ad intestina demonstrare et quid diversi lacteis sanguiferis intercedat, facile declarare potero. Vasa lactea in iunioribus ampliora esse videntur, quam in senibus, ideoque in illis facilius quam in his spectantur. Decurrunt autem, postquam e villosa tunica per nervoso-cellulosam et musculosam penetrarunt, inter hanc et tunicam membranaceam, a peritoneo natam, a qua proxime in cellulosa teguntur, ita, ut magno et fere longitudinali arcu arterias et venas intestini decussent. Enimvero non eandem eorum esse directionem, quae sit vasorum sanguiferorum, facile vidi, posteaquam per arteriam venamque mesaraicam magnam, lacteis antea repletis, ceraceam materiam in vasa sanguifera intestinorum immiseram. Cum in fene septuagenario arterias et venas intestinorum ichthyocola replevissem, liquor non solum haec vasa, sed contextum etiam cellulosum, in quem, ut mihi videbatur, effusus erat, vel quem distenderat, ita pinxerat et mutarat, ut pauca quidem lactea in hoc ipso cadavere huius senis conspicerem eorumque nonnulla iniecto humore replerem, in quibus tamen, cum glandulae mesaraicae obstructae essent, longius versus radicem mesaraei mercurius non perrexit. Contrarium melioremque experimentorum successum in cadavere iunioris hominis, unde

h) Dissertat. de fabrica et actione villorum intestinorum tenuium. Lugd. 1745.


i) in dissertatione de motu chyli et lymphae anno 1778. edita.

k) l. c.

l) History of the absorbent system etc. Lond. 1784. p. 37.

m) l. c. p. 56.

unde icon quarta nata est, sum expertus. Praeterea et hoc mihi videor animadvertisse, progressum eorum saepius non curvum tantum sed serpentinum etiam esse et plures valvulas ac brevioribus intervallis, quam in lymphaticis, separatas, in iis inveniri. Ubi ad marginem concavum intestini venerunt, directione et progressu per mesenterium ad glandulas a vasis aliis plane differunt. Etenim a margine intestini concavo, immo prius saepe, in tres quatuorve truncos dividuntur et trans arterias et venas obliquo cursu proximas glandulas petunt. In isto autem ad glandulas accessu trunci multoties dividuntur (Tab. IV.), quorum alii cum omnibus suis ramis a glandulis, intestino proximis (litt. b. b. b. b.), introitu suscipiuntur; alii eas praetereunt, ut ad glandulas, quae intermediae sunt, et quas secundi generis dicere scriptores solent (litt. c. c. c.), distribuuntur; sunt etiam, qui ad glandulas tertii generis, sive, quod mihi magis probatur, radici mesenterii proximas, extenduntur et cum iis coniunguntur (litt. d. d.), in plerisque tamen e glandulis primi generis, quas intestino proximas dicere mallet, maiores iis, qui eas intrarunt, trunci egrediuntur, et, cum lateralibus anastomosi iuncti, partim secundi, partim tertii generis glandulas et principio ductus thoracici proximas adeunt et ab iis excipiuntur. Qui ab intestino in glandulas primi generis immittuntur, hos, ut Cl. SHELDON iam animadvertit, raro cum collateralibus anastomosi iunctos esse, sed mox ad glandulas dirigi etiam vidi. Quo loco arteria mesaraica magna (litt. e.) similisque vena (litt. f.) in modum arcus flectuntur, ut arcus vasculosi mesaraici inde nascantur, quatuor immo sex septemve maiores glandulae reperiuntur, ad quas mole maiores quidem, numero tamen pauciores trunci lactei colliguntur ita, ut, paucis qui eas non intrarunt, ad principium ductus thoracici ipsius directis, omnis fere chylus per has tertii generis glandulas nonnullaque exinde producta maiora vasa lactea in ductum thoracicum tanquam in receptaculum infundatur (litt. l. l. l.).



S E C T I O II.

DE MOTU CHYLI ET LYMPHAE GLANDULISQUE CONGLOBATIS

D I S S E R T A T I O

ITERUM EDITA, EMENDATA, MULTUM AUCTA ET CUM
NOVIS EXPERIMENTIS ET ICONIBUS COLLATA.

§. I.

Motus chyli in villos intestini.

Ut appareat, quo redeant haec de vasis lacteis intestinorum et lymphaticis cutis aliarumque partium repletionis auxilio visui clare exponendis a me facta et hactenus commemorata experimenta, ad eorum qui lymphatico vasorum genere continentur, humorum motum me convertam, et, cum alia eorum unum idemque humorum genus vehant, alia modo lympham, modo chylum propellant, a motu chyli ordiar. Liquidum hoc in homine et plerisque animalibus album, in avibus autem pellucidum et lymphae simile a), ex elementaribus alimentorum particulis, quae vegetabilis putrefactionis auxilio dissolutae et cum propriis animalibus succis digestae sunt b), compositum est et canalibus continetur, quos antiquitas venas Asellianas et vasa lactea dixit. Novimus enim in intestinis, tenuibus maxime, quae aqua elota fuerint, si inversa in vas vitreum, aqua pura repletum, immergantur, tum in rugis, quae a KERKINGIO nomen acceperunt, tum in omnibus villosae tunicae locis, praeter ea, in quibus glandulae inveniantur, flocculos, villos dictos, conspici, quorum de fabrica quae cognita habemus, LIEBERKÜHNIO c) plurima ex parte debemus. Cuius ex observationibus constat, componi villum ex arteria vena atque nervo, hasque partes cum principio vasis lactei esse coniunctas; in extremo villo caveam esse, quam ampullulam vocat, foraminibus instructam, eamque intus spongiosam sive cellulosam reperiri, praetereaue extremam arteriam et venam in eam patere. In animalibus, quae brevi ante sectionem lacte pasta erant, extremum villum albo humore turgere vidit d), unde concludit, cavum adesse, quod per accessum chyli dilatatum fuerit, atque, ne quid dubitationis superesset, in arteriam et venam ceram immisit, viditque ceram albam in extremam partem, quam vi prioris experimenti cavitatem ampullam esse existimarat, effluxisse e). Expandit etiam partem intestini inter duos

a) HEWSON'S *experimental inquiries of the lymphatic system*. cap. 4.

b) ARBUTHNOT *essay of the aliments*; cap. I. prop. 3.

c) *Dissertat. de fabrica et actione villor. intestin.*

d) l. c. §. 2. 3.

e) In iis experimentis, in quibus cera non in

ampullulae cavum pervenerat, materia injectionis adeo erat diluta, ut per minima vasa in cavum intestini penetraret citius nilque in cavum villi effunderetur; in illis autem, quibus adhibuerat materiem ceraceam tenuiorem, haec materies cum ad cavum intestini penetrare non posset, in ampullulam discesserat. l. c. §. 6.

duos metallicos annulos, et, aere per vasa sanguifera immisso, extremus villus, vesiculae instar, attollebatur f). Hanc igitur caveam, quotiescunque intestinum fibris muscularibus contrahatur, cum extremo villo in alimenta diluta immergi, quo facto liquidissimam ciborum assumtorum partem ampullulae adhaerere, per foramina eius intrare eamque replere, idque potissimum fieri, quando contractae fibrae musculares relaxentur: eo enim tempore contigua et contracta vasa sanguifera rursus extendi ipsamque ampullulam pristini loci atque magnitudinis fieri. Iuvare autem hanc ampullulae expansionem tela cellulosa, intus reperiunda, cuius elatere parietes cavi a se dimoveri, ut chylus a cavea et principio vasis lactei commode excipi, exceptusque in truncum vasis ulterius transferri possit, quod nova intestini contractione fieri g). Nam dum fibrae musculares contractionem moliuntur, ea portio, quae ampullula et principio vasis lactei continetur, premitur, haec vero, partim, quoniam valvulae reditum intercipiunt, partim, quia aucto vasis lactei diametro resistantia tanti momenti non est, unde obstaculum ponatur, coeptam viam persequitur. Quibus positis, chylus sine motu intestinorum peristaltico neque in ampullulam villi neque in vas lacteum propellitur. Ea enim de causa non solum iam acceptus chylus a vasis contractionis tempore in continuis ramis mesenterium versus urgetur, sed relaxationis etiam stadio ipsi novae chyli portioni, ampullulam ingressurae, spatium datur. Equidem olim h) quaedam mente revolvebam argumenta, quae his repugnare mihi videbantur. Cogitabam enim, vas lacteum, chylo plenum, turgere, hacque de causa cavi formam induere, istam vero vesiculae speciem cum Virum fallere et in eam opinionem adducere potuisse, ut magis simulatam quam veram ampullulam ante oculos habuerit. Lubricum etiam fallaxque mihi videbatur argumentum a repletionem vasorum petitum, cum injectio artificis anatomica doceat, quamcunque partem, si vasorum repletio ex voto fuerit facta, elevari atque aliam, quam naturalem speciem prae se ferre posse. Mihi praeterea persuadere studebam, cum retiformis sit vasorum lacteorum inter tunicas intestinorum, saltem inter membranaceam et muscularem, anastomosis i), talein telam ita per aerem, ei immissum, elevari potuisse, ut extremus villus processum vesicularem effinxerit. Quid quod Cl. HEWSON hanc villi structuram sectione variorum animalium non comprobare et in avibus, piscibus atque testudine, nullas in villosa tunica vesiculas, sed modo poros, modo processus iis instructos inveniri prolixè asseruerit k)? Attamen, cum postea temporis in villorum fabrica, praesertim vasis lactei ex intestinorum tunica villosa incipientis, etiam alii Clarissimi Viri, CRUIKSHANK l) et SHELDON m), quorum ille orificia vasorum lacteorum absorbentia in ampullula microscopio, hic vero in variis cadaveribus ampullulas tales vidit, quales LIEBERKÜHNUS descripsit, de ampullularum praesentia dubia mea lubenter dimitto. Unum est, quod motum peristalticum intestinorum motus chyli in ampullulam causam esse dissentiam. Neque enim a motu isto intestinorum tanta vis oriri mihi videtur, qua chylus, cum effugium in longitudine tubi

intestini

f) ibid.

g) ibid. §. 21.

h) in prima huius dissert. de mot. chyli et lymphae edition. anni 1778.

i) LIEBERKÜHN, l. c.

k) l. c.

l) Remarks on the absorption of Calomel from the internal surface of the mouth; pag. 56.

m) History of the absorbent system etc. p. 37.

intestini habeat, in angustam ampullulae aperturam prematur, neque desunt aliorum humorum exempla, qui aliis, quam pressione, causis in corporis interiores partes suscipiuntur.

§. II.

Vera huius motus causa.

Ne vero, relicta illa opinione, aliam, quam physicis et anatomicis fundamentis superstructam eligamus, in memoriam nobis revocemus ea, quae de villosa tunica canalibus alimentorum ita cognita atque certa sunt, ut vix ab ullo de iis dubitetur. Vix est, qui cutim, etsi locis, quae patula sunt, intercapedines intercipere videatur, interruptam esse credat: ea enim ad omnes corporis hiatus ab exterioribus reflexa et in iis mutata, cavum quod intrat, ab interiore parte investit. Quae epidermis est, in intestini villosam prolongatur n). Iam vero non solum RUYSCHII, HALLERI atque Venerandi mei quondam Praeceptoris LUDWIGII observationibus constat, arterias et venas cum nervis inde a partibus muscularibus et cellularibus ad exteriorem cutis telam, quae in cuticulam abit, extendi atque sub papillarum cutanearum specie oculis subici, sed nec dubitandum est, lymphatica absorbentia vasa iisdem intertexta esse, cum sanguiferis connexa. In qua opinione confirmamur tum, quoniam vasa lymphatica cum contextu celluloso connexa et ad cutim ipsam pertinentiaprehendimus o), tum etiam, quoniam particularum acrimiarum morbosarum p) atque medicatarum q) quae fuerint resorptae, effectus ad glandulas, huic cutis parti, cui applicatae et qua resorptae fuerint, proximas pertinet; quae ubi sanae fuerint, vel intumescunt, vel, obstructae, molliores redduntur atque infartos humores dimittunt. Papillulae hae cutaneae, in quas resorptionem cadere diximus, nonnullis in partibus eam speciem prae se ferunt, ut eas villos rectius dicas, cuiusmodi prominentibus nervosis partibus apices digitorum, labia oris atque lingua abundant. Cum igitur cutis ad oesophagum ventriculum et omnia intestina perveniat eiusque epidermis in his partibus villosam tunicam effingat r), statuendum est, villos istos praeter solam ampullulam partium, quibus componatur, indole, papillulis cutaneis longioribus simillimos esse, et in iis non minus, ac in cute, absorbentia lymphatica sive lactea extare, quae vi suctionis chylum ad eum modum attrahant, ad quem varia a cute resorbeantur. Si praeterea ea, quae Cap. VI. de vasorum lymphaticorum inhalantium cutis origine experimentis demonstrata sint s), in mentem nobis revocemus, eademque radices sub cuticula e corpore reticulari suas trahere et quidquid ab exteris forbeant, id ea per porum cuticulae assumere, lacteum autem vas ampullulae orificio chylum sugere cogitemus: maximam tum partium ipsarum tum earundem actionis similitudinem esse ipsi intelligemus. Hoc addere vellem, villi vesiculam sive extremam eius partem

n) HALLER. *element. physiol.* tom. 5. p. 12.

o) Vid. cap. 2.

p) Variolas superatas tumores glandularum colli sequuntur: sine dubio fomes variolosus in contextu celluloso sub cute contentus per vasa lymphatica resorbetur et ad glandulas ducitur, unde, morbo iam superato, inflammatio et suppuratio non parum

molestiae faciunt, dum vasa sanguifera ab obstructis lymphaticis irritantur et ad inflammationem evocantur.

q) Quo propius glandulis mercurialia illinuntur, eo citius obstructions earum resolvuntur.

r) HALLER. l. c.

s) pag. 13.

partem celerius et copiosius, quam cutis inhalantia vasa, resorbere posse, quum constet, tum inhalationem, tum perspirationem ab epidermide, quae in cute durior est, temperari t). Quae cum ita sint, causa, quod chylus in vas lacteum intrat, non alia est, quam vis illa canalibus capillaribus lacteis insita, quae quidquid fluidi orificiis applicatum est, attrahunt tamque longe ab cavo intestinali removent, quam diameter vasis diametrum capillaris canalis non excedat. Idem ergo fit, quod fieri scimus in motu succi plantarum, qui, ex terra vel aere vasis capillaribus attractus, in cohaerentibus canalibus elaboratur u). Sed hoc quaestionis caput est, unde canalibus istis ea reddatur rigiditas, qua more tuborum capillarium chyli particulas attrahere possint, cuius rei causam inventuros nos oportet oculos ad vasa convertere, quae magna ex parte villum conficiunt, et quae, dum humoribus plena sunt, istos vasis lactei parietes ita distendunt, ut more canalium e vitro confectorum rigeant. Nam cum intestina cadaveris lacte repleta essent, vasa lactea in solo animale vivo, neque vero in mortuo chylo plena cernebantur x); ergo extincto in vasis humorum motu sublata est canalis tensio et resorptio opus est canalis, qui vi humorum, qui ad circumiecta vasa adducuntur et per ea transferuntur, riget. Cum his etiam ea consentiunt, quae in villis intestinorum, si injectio ex voto facta est, facile ceruntur. Memini tales rubros villos me in parte intestini tenuis videre, cuius vasa Cl. IANCKRUS, Venerandus meus in anatome Praeceptor, cera repleverat. Nam si liquores, in vascula villi arte impuls, eundem protrudunt, quidni idem praestent humores ad villum alia ex causa adducti? Verisimile itaque est, liquidiorum alimentorum partem villum nervo instructum et sensilem irritare et motu humorum in vasis ei circumfritis aucto, extremum vas lacteum, dum riget, proximas quasvis attenuatas partes absorbere. Ipsam vero etiam ampullulae fabricam suctioni non contrariam esse, animalia, quae ampullulis sugunt, ut taeniolae, satis probare videntur y).

§. III.

Motus lymphae e cellulis et cavis alius generis in principium vasis lymphatici.

A chylo ad lympham transeo. Celebratissima est BOERHAAVII, quae de decrefcentibus vasis extat, sententia z), cui et hoc inest, vasa lymphatica ex arteriis oriri venisque rursus inferi, quae cum experimentis confirmari videntur, plurimis probabantur. Fidem huic opinioni non solum LOEWENHOECKII observatio fecerat, qui oculo armato in sanguine globulos rubros maiores, serosos minores et his minores albos lymphaticos se vidisse affirmarat, quos vasorum diametris aiebat ita esse accommodatos, ut, qua globulorum moles decrefceret, eadem ratione vasa minora invenirentur, sed viderat etiam in NUCKII a), aliorumque experimentis, injectos in arterias humores in vasa lymphatica transiisse, cuius rei causam esse nexum vasorum arteriosorum et lymphaticorum. Simplicissima igitur lymphae in vasa et ad sanguinem transitus explicatio

t) LUDWIG. dissert. de cuticula, §. 19.
MORGAGNI adversar. II. animadvers. 3.

u) WHYTT of the motion of the fluids in the absorbent vessels. Vid. Oper. p. 243.

x) HEWSON, l. c. cap. X. p. 184.

y) WERNER et FELLER description. vasor. lacteor. atque lymphaticor. p. 14.

z) Praelection. acad. in institut. med. Vol. 2. §. 226.

a) Adenolog. cap. 4. 6.

explicatio haec esset, eam, in arteriis minimis evolutam, ipso earum systaltico motu in principia vasorum lymphaticorum protrudi et inde partim in venas connexas, partim ad glandulas conglobatas, et deinde per ductum thoracicum in subclaviam venam promoveri. Neque tamen cum his consentiunt ea, quae ex MONROI b) meisque aliquando eodem modo institutis experimentis fluxerunt. Nam cum mercurius in arteriam spermaticam propulsus in vasa lymphatica non intrasset, sed in cellulas antea effusus inde in lymphaticos canales regressum sibi parasset; quilibet intelligit, lympham, tum eam, quae in quocunque contextu celluloso invenitur, tum istam, quae in ventribus viscerumque interstitiis diffusa continetur, non ex arteriis ipsis, sed variis cavis, quorsum ex arteriis venerat, resorberi. Iniectiones etiam ceraceae materiae, cui copiosum oleum therebinthinae admixtum est, vel tales, quae ex ichthyocolla vel therebinthina cum aqua fervida commixta et cocta paratae sunt, liquoribus istis in arterias injectis, rete effingunt, in quo non cum vasis lymphaticis, sed cum arteriis venarum est anastomosis. Haec enim tum injectum liquorem suscipere, si tela cellulosa, quae cum rete coniuncta eique circumiecta est, repleta sit, gravissimus autor MASCAGNI experimentis multis modis nuper institutis solide declaravit c). Utrum vero haec resorbenda lympham ex rete isto vasculoso, quod a minimis arteriis et venis componitur eo loco, quo horum vasorum anastomosis initur, per poros inorganicos, an exhalante arteriola lymphatica in tela cellulosa deponatur, dictu facile non est. Si in mentem mihi revoco, me in cadavere infantilis corporis, cum vasa eius oleo therebinthinae cinnabari tincto, cui pauxillum sebi additum erat, replevissem, multis locis sebum arteriis venisque circumiectum, non tinctum colore, reperisse, praetereaque etiam eiusmodi sebum e naribus et rete vasculoso membranae pituitariae provenisse; a veritate non aliena mihi propemodum videntur, quae de secretionibus per secessum particularum per poros inorganicos nuperrime scripta sunt d). Tenuissimos tamen humores, ut in corticali cerebri parte et in conjunctiva oculi membrana, in quibus pauca rubra vasa cernuntur, non ex productis minoribus et exhalantibus, sed e rete arterioso ipso rubris globulis instructo secerni, opinio est, cuius assertio difficultate prorsus vacare non videtur. Qui vero secundum BOERHAAVIUM lymphatica vasa arteriis continua esse, et, quod consequens huius opinionis est, lympham in reducentia vasa transigi statuunt, ii ingressum in istos canales non resorptione, sed pressione repetunt, nec minus errant ac illi, quibus chylus praecipue motu peristaltico

per

b) *Observat. anatomic. and physiol.*

c) *Prodrome d'un ouvrage sur le système des vaisseaux lymphatiques*, pag. 8. ubi nexum vasorum lymphaticorum cum tela cellulosa ita exponit: *J'ai injecté avec de l'eau chaude colorée les Vaisseaux sanguins des autres parties, cette eau a suinté de couleur pâle dans la Cellulaire, Et s'est glissée avec cette couleur dans les Vaisseaux lymphatiques de ces parties. Les parties se sont enflées comme dans l'Hydropisie.*

d) Liquorem tenuem per iniectiones anatomicas ex arteriis in contextum cellulorum per

poros earum secedere nec ABRAH. KAAU nec HALLERUS ignoravit; nuper vero Cl. MASCAGNI, cum eiusmodi experimenta repetiisset, iisque vidisset, ichthyocollam, cui cinnabarim addiderat, deposito rubro colore, per poros arteriarum et venarum in telam cellulosam partium quarumcunque effugisse, secretiones ex analogia explicandas et ex rete vasculoso arteriarum et venarum repetendas esse asseruit. *Prodrome* etc. cap. 2. KAAU *de perspirat. Hippocr.* n. 563. HALLER. tom. I. *elem. physiol.* pag. 17.

per venas lacteas moveri videtur, nisi quod pressionem diverso modo fieri fateantur. At enim vero, ut villum non nisi suctione lacteum illum humorem recipere intelligimus, sic lymphatico vasi insita est quaedam vis, qua illud humorem in cellulis cavisque contentum absorbeat. Non obstat huic opinioni, quod canales illi, collapsi et in cadavere, vix resorbeant. Natura enim utrique vasorum generi, lacteo aeque ac lymphatico, dum vita et irritabilitas iis insunt, adiumenta addidit, quibus ad modum tubulorum vitreorum capillarium tam obliquo quam perpendiculari situ liquidum absorbeant. Non solum chylus, qui e gelatinosis alimentorum particulis humanisque, naturali visciditate praeditis, liquoribus commixtus est, orificiis villi sponte adhaeret, sed lymphae etiam, quae ex sanguine vel in cellulas vel in ventres collecta est, non pro mera aqua est habenda, sed, cum ea, morbosae, vel in pus mutata, vel hydropicorum paracentesi protracta, floccos ostendat et ad ignem in grumos concreascit e), tenax est, et a sugente canale facile suscipitur, modo reliquae, a quibus parietes eius rigeant, adsint causae, quas quidem adesse reperies, si cogitaris vasa sanguifera, vasi lymphatico circumiecta, sanguine plena et ob propriam plenitudinem, vel lentum recepti fluidi motum vasa lymphatica ipsa distenta esse.

§. IV.

Chyli et lymphae per vasa lactea et lymphatica progressus.

Resorpti humores partim ob angustiam vasorum capillarium partim ob valvulas, quibus lactea nec in intestinis carent (Tab. IV. litt. i. i.), in locum, unde venerant, redire nequeunt, sed in itinere promoventur. Contractae intestini fibrae motu peristaltico canalem lacteum stringere et chylum in ampliores protrudere truncos videntur: attamen, cum vel eo tempore, quo exiguus est intestinorum motus, vel brevi post mortem in animalibus chylus promoveri visus sit, haec vera causa esse non potest. Praestat chyli propulsionem tum a nova portione resorpta, tum a propriis, in ipsa vasis structura positis, viribus repetere. Nullum enim dubium est, ut in capillaribus plantarum canalibus succus attractus praecedentem propellat, ita et in lacteis vasis chylum eadem causa e loco suo moveri. Quod facile est concedendum, cum valvulae reditum impendant, vasa vero ipsa, ubi nerveam et musculosam tunicam exteriori partem versus penetrarint, in exteriori cellulosa retiformi plexu connexa sint et ampliora reddantur f), ita ut, si quo loco difficultas viae fuerit facta, per proximos canales exitus concessus deprehendatur. Quemadmodum enim in sanguiferis vasis frequens ramorum anastomosis sanguinis cursum dirigit facilemque reddit; ita non minus in illis canalibus, toties inter se connexis, chylus tarde quidem, attamen absque periculo impediti progressus in maiores truncos procedit. Addenda praeterea est vasis lactei et lymphatici structura, quae, etsi ob fibrarum teneritatem sensibus parum subiiciatur, ratione tamen cognosci potest. Fere unicum, quod sensibus patet, hoc est, quod ad stimulum applicatum fortius constringantur et irritabilitatem prodant g). Sed hoc ipsum nos in viam ducit, in qua ea, quae oculis non patent, quasi mente et coniectura assequi

e) *Mem. de l'Acad. des sciences*, 1701. p. 152.
f) LIEBERKÜHN, l. c. tab. II. III. SHEL-
DON, l. c. tab. I.

g) HALLER. de part. corp. human. sentient.
et irritabil. exper. 249. 250. 251.

assequi possimus. Apparet enim, oportere iis inesse nervos, quibus cum vasis sanguiferis connexis vel veram muscularem h), vel certe, ut in aliis corporis nostri partibus videmus, ei analogam habeant tunicam. Quibus positis concedendum et hoc est, interiorum eorum parietem ita sensilem esse, ut a liquido incluso ad contractionem evocentur. Quare ut Clarissimum WHYTT i) sequamur, uti in plantis canalium motus caloris stimulo excitatur, ita in animalibus fibrae vasorum non solum chylum, sed lympham etiam vehentium, stimulantur atque irritantur, ut propria et insita vi contentum humorem moveant. Contractio igitur intestinorum, diaphragmatis, aliorumque respirationis organorum motus et arteriarum mesaraicarum pulsus accessoriae quidem sunt causae, verae tamen dici non possunt.

§. V.

Glandularum conglobatarum utilitas.

Cum uterque liquor, chylus et lympham, ad glandulas conglobatas et ex iis ad ductum thoracicum venamque subclaviam propellatur, videndum est, num quid e glandularum fabrica colligi possit, quod his humoribus, per eas motis, accadat. NUCKIO, qui in muscosa et fibrosa glandularum substantia lympham non tantum attenuari, sed per succum etiam nerveum, a nervis, qui glandulas ingrediantur, adductum, subtiliorem reddi et singulari quadam vi instrui credidit k), non assentior; cum ipsius glandulae nervorumque in eam ingredientium ea non sit proportio, quae hanc sententiam veram esse iubeat. Neque magis ea placent, quae MALPIGHIUS protulit, cui in conglobatis istis partibus folliculi constructi esse visi sunt, quibuscum lymphatica vasa, tanquam ductus excretorios, ita esse connexa, ut, quidquid in illis sit depositum, ab his educi existimaret l). Quae si essent, invenirentur folliculi, quorum tamen nulli visi sunt, et, si qui forte inventi fuerint, eos propter morbum inventos esse Clarissimo HENDI m) credere maluerim. Quae MONROUS n) et MECKELIUS o), Cl. Viri, fecerunt, experimenta, in quibus mercurius per vasa lymphatica in glandulam intrarat et ex oppositi lateris margine rursus exierat, suadere videntur opinionem, glandulas istas nil aliud, nisi lymphaticorum vasorum, copiosissima anastomosi in globosa ista parte coniunctorum, plexus esse, eorumque fabricae auxilio lympham, per tot angustos atque toties flexos canales provecram, ad futuros usus praeparari, neque aliud liquidum cum ea commisceri, nisi lymphaticum, illi prorsus simile, quod ex cellulosis partibus advenit.

h) Nam cum irritabilis vis secundum HAL-
LERUM fibrae muscularis sit, colligi inde
poterit, musculosi quid in tela vasorum
lymphaticorum inesse, vel musculosae
analogum.

In ductu thoracico equi fibras musculo-
sas nuper Cl. SHELTON vidit. Numerat
eius tres tunicas, quarum externa in thorace
et abdomine membranacea est a pleura vel
peritoneo orta; media est muscosa, ex
fibris maximam partem circularibus com-
posita sed alius etiam directionis intermi-
stae sunt; tertia est interna cum media per

tulam cellulosa coniuncta; haec interna
polita et densa est ideoque exsudationem
lymphae prorsus impedit et valvas efficit,
l. c. p. 26.

i) WHYTT *of the motion of the fluids in the
small vessels*, sect. 2.

k) l. c.

l) *Epistol. de structur. glandul. conglobat.*
p. 145. vid. oper.

m) *Comment. medic. Edimburg.* versio. teu-
ton. tom. III. part. I. sect. XI.

n) *Observat. anatom. and physiol.* p. 40.

o) *Dissert. epist. ad HALLER.* de vasis lymph.

nerit. Si cogites iniectionis auxilio monstrari, copiosas arterias glandulam penetrare atque per cellulofam eo modo, quo RUYSCHIVS illas ostendit, distribui, venasque adesse, quae sanguinem reducant, verifimile est, naturam eam ob causam hanc distributionis atque convolutionis vasorum speciem fecisse, ut lymphaticus in iis fecerneretur humor talis, qui a tenuissimae telae vasis elaboratus differat ab eo, qui ex corporis partibus cellulosis fit resorptus eumque subtilitate et bonitate antecellat p). Quemadmodum enim chylo iam in intestinis bilis, succus pancreaticus, alique liquores, e vasis secreti, admiscuntur, ut succis corporis animalis assimiletur; ita is in transitu per glandulas mesaraicas, cum e cellulis subtilis et admodum elaborata lympham resorbeatur, ad futura corpori praestanda commoda aptior reddi videtur. Eadem in reliquis glandulas conglobatas cadunt. Cellularum, unde radiculae vasorum egredientium lymphae ordiuntur, teneritas q) opinionem suadet, lympham aliunde ad eas adductam, affluxu tenuioris liquidi mutari et ad secretiones varii generis perfici.

§. VI.

Praeter utilitatem iam demonstratam conceditur esse aliam.

Ne autem negem, quae satis firmis argumentis, uti mihi videntur, probari poterunt, praeter eam, quam in elaboranda tenuioris et melioris generis lympham posui, utilitatem, praecipuam hanc lymphaticarum glandularum esse facile largiar, ut id ipsum liquidum, e cellulis corporis resorptum per ambages istas atque viae longitudinem et difficultatem attenuetur, et ad officia multiplicis generis praeparetur. Diligens organorum corporis animalis disquisitio quemque docere poterit, secretionem humorum actionem admodum operosam esse, nilque, in usus corporis impendendum, proxime e mere rubro sanguine deponi, sed in minoribus vasis elaborari et ad propria receptacula deponi omnia, quae separentur, liquida. Etsi enim non ignoro, extare varia humorum genera, quae partim, quoniam superflua sunt, partim etiam, quoniam, etiamsi crassior eorum sit mixtio, utilitate autem non carent, actione arteriarum e circulo sanguinis separentur; plurimorum tamen, quae secreta sunt, liquidorum utilitas et particularum, quae iis insunt, facultas in eam nos deducunt opinionem, oportere in sanguine esse materiem quandam, non tantum uberrimam, sed admodum etiam attenuatam et vi circuli ita elaboratam, ut per varia cola transire variosque in usus impendi possit. Atque haec erit lympham, quae, postquam per minora vasa ad cellulas compulsam et in iis ad aliquam moram deposita fuit, denuo, ut ad usum aptissima reddatur, vires vasorum reducunt, praesertim in plexibus glandulosis satis experta est. Nam cum lympham non acre sit fluidum, sed blandum, videtur illa in cellulis ita spissa reddi, ut, cum absque tenuitate utilis esse nequeat, nova resolutione, qua arctius attractae particulae dirimantur, opus sit. Tales enim humores resolvendi et attenuandi vires non solis arteriosis sed alius etiam generis canalibus attribundas esse, venae portae exemplo probari poterit, cuius ramos, etsi fabricam arteriosam non habeant, ad sanguinis tamen globulos dividendos plurimum valere bilis

p) RUYSCH. de fabrica glandular. Epistol. ad BOERHAAVIUM.

q) Conf. Ic. I. fig. 2. et Ic. II. et Cl. MASCAGNI Tab. I. fig. 8. 9. 10. 11. 12.

bilis secretio quemcunque docet. Quamobrem mihi non displicet opinio, ut alios humores in aliis organis, ita lympham in glandulis et plexibus resolvi et praeparari, ut per alias tenerrimae fabricae partes transire et in secernendum cuique organo proprium humorem impendi possit.

§. VII.

Obiectiones nonnullae remouentur.

Venio tandem ad eas, quas evitare hic loci nequeo, obiectiones, in quibus refellendis, cum iam alii iis obviam iverint, brevis ero. Prima haec est, cuncta, quae hactenus de resorptione et progressu chyli et lymphae a me disputata sint, ad vasa lymphatica pertinere, atque ne verbum quidem de ea doctrina, quae eadem fluida venis resorberi praecipiat, factum esse; non enim probabile esse, solis vasis lymphaticis hoc esse privilegium datum, ut eos humores ad sanguinem transvehant. Villus intestinalis in extrema parte ampulla instructus esse dicitur, cui ita adnexae sint arteria et vena, ut uterque canalis alio fine in ampullam, alio in intestinum finiatur; venam autem dicunt partim intestinali furculo ex ipso intestino, partim alio, qui in ampullam terminetur, ex hoc cavo partem resorpti liquidi intra suum alveum recipere r). Cuius opinionis aucta est probabilitas, quoniam nonnullis anatomicis sanguini, in venis mesaraicis contento, globuli albi admixti visi sunt, qui speciem chyli habuerunt. Accedit et hoc, in experimentis celeberrimorum quorundam virorum in ventriculo vasa lymphatica apparuisse, quorum terminus in ramis venosis fuerit s). Atvero quaecunque demum illa sint argumenta, quibus MONROUS t) alique in resorptionis societatem venas trahere studuerunt, tantam tamen vim habere mihi non videntur, ut, quae ab aliis in contrariam partem disputentur, audienda esse negem. Etsi enim materies, siphone in venosum ramum mesaraicum iniecta, ad ipsum cavum intestini et in ampullam villi, quam LIEBERKÜHNIIUS alique post eum viderunt, pervenire potuit, quaestio tamen est, an non vis, qua materies per siphonem iniecta fuerit, tanta extiterit, ut, superata tenuiorum venae fibrarum resistantia, liquor eo modo e cancellis diffugeret, quo illum saepe in infantum cadaveribus ex arteriis in venas transire memini. Qui chyli globulos in sanguine mesaraico conspexerunt, eos serum fallere potuit, cuius globuli in sanguine ex vena misso pellucidi et haud raro albi apparent. Denique si mercurius e vase lymphatico in venas transit, dubitari potest, an non mercurius per fibras a se invicem divisas in venas introitum sibi fecerit: et si dixeris aquam colore tinctam ex intestinis in venas transiisse, experimenta eorum, qui haud facile nec sine magna pressione aquam in eas impulerunt, contrariam suadent sententiam. Argumentum quod prae ceteris pondus habere et resorptionem quarundam particularum per venas mesaraicas sustinere videretur, hoc est, in senibus, etsi glandulae mesaraicae parvae et obstructae sint, nutritionem tamen quandam locum habere. Atenimvero vix eo usque decrescunt neque ita obstruuntur, quin aliqua chyli pars a lacteis vasis resorberi et per canales nondum impervios ad chyliferi ductus principium deferri possit.

§. VIII.

r) LIEBERKÜHN. disput. cit.

s) Ill. MECKEL. dissert. epistol. ad HALL. de *vasis lymph. et gland.*t) *Observat. anatom. and physiol.* p. 55.

§. VIII.

Sanguinis et lactis resorptio.

Quam viam humores, de quibus egi, sibi ad sanguinem eligunt, per eandem etiam alii resorbentur. Enimvero si qua pars inflammatione attingitur, sanguis ad minores eius arterias propter istum, qui inflammata[m] partem ferit, stimulum, velocius maiorique, quam antea, copia allicitur, quo facto illae elatere resistunt et contractilitate aucta, quod susceperant, illud in radículas venarum, quae arteriis non minus distenduntur, impetuose propellunt. Quodsi vero impetus iste, quo sanguis proici solet, non minuitur, sed crescit, sanguis diapedesi arteriarum, forte etiam venarum in contextum cellulosum dilabitur et inflammationis periculum crescit. Nam in inflammatione sanguinem in cellularia spatia secedere idque non semper, ut in gangraenosa, perruptis, sed integris etiam vasis fieri, observationibus non paucis et varii generis HALLERUS probavit u). Sanguinis in telam cellulosa[m] effusi, praesertim, cum, collectus haerensque, eo loco cogi videatur, tanta quidem tenuitas non est, ut particulae eius initio facti in cellulosa[m] secessus ab angustis vasorum orificiis suscipiantur: quodsi tamen lymphæ affluit, quae caloris auxilio eum diluit, congregati eius globuli dividuntur et extremis vasis sorbentur. Egregie cum his observatio Clarissimi CRUIKSHANK consentit, quem legimus in inflammatione peritonei et intestinorum vasa lymphatica sanguine, lymphæ diluto, plena reperisse x). Si qua pars contusione affecta est, eadem in resolutionem humorum cadunt, qui alienum petierunt locum. Vasis enim propter vim sibi illatam partim ruptis, partim relaxatis, humores e loco, qui diverticulum iis concessit, ob causam modo commemoratam lente et longo temporis intervallo resorbentur. In fracturis ossium vel propter dilacerationem, vel debilitationem ac pressionem, vasa, fractis partibus proxima, sanguine obruuntur et aegrotæ parti graves superveniunt in telam cellulosa[m] ecchymoses, quae humoribus, qui effusi e vasis erant, resorptis, tolluntur. Decocta plantarum amararum, cum liquore semispirituoso et sale ammoniaco commixta, partim coactos humores, si calor accesserit, resolvunt simulque putredini resistunt, partim non sanguiferorum tantum vasorum firmitatem conservant, sed lymphaticorum etiam robur, quo ad sugendos humores carere non possunt, efficacissime tuentur. Cum tibia et fibula spithamæ longitudine super malleolos oblique fractæ essent, sanguinem inde a genu per totum crus, maxime per posteriorem eius partem in contextu celluloso collectum esse monstrabant livor et tumor cutis, qui, cum aegrotus iam provectioris esset ætatis, tardius, quam in iuniore homine et mense elapso, calloque iam formato, evanuerunt. Si quis cogitet, ab omni cruris contextu celluloso subcutaneo multa superficialia vasa lymphæ, profunda vero ex interstitiis musculorum iuxta arterias venasque tibiæ et fibulae ad pelvim ascendere y), prætereaque iconem H; quae glandulas et plexus pelvis refert, spectet; sanguinem, licet copia eius, extra vasa missi, non parva fuerit, resorberi quidem, hunc autem eius per tot angustos tamque anfractuosis glandularum et plexuum canales regressum, præsertim in corpore provectio-

ris

u) *Element. physiol.* tom. I. pag. 37.x) *Remarks on the absorption of Calomel etc.* pag. 27.

y) MASCAGNI tab. II.

ris aetatis, tarde perfici et ecchymoses non nisi pedetentim dissipari potuisse, facillime intelliget.

Eadem de mammis valent. Ut enim in tela cellulosa aliisque cavis lympham, ita ex ductibus lactiferis, nisi eius per ductus excretorios exitus iuветur, lac vasa lymphatica inhalant, adeo, ut in isto a mamma per axillarem regionem tractu glandulae intumescant, et, si resorpto liquido obruantur, puerperae nutrices dolorem sub axillis inde percipiant. Hic autem liquor, cum chylus sit circulatione sanguinis mutatus et lympham admixta dilutus, natura ad inhalationem optime est comparatus.

§. IX.

Puris et ichoris resorptio.

Pus, bonum aeque ac tenue et acre, si quo loco colligitur et nec natura nec arte exitus ei paratur, non minus ac alia fluida, resorbetur, et ad sanguinem transfertur. Boni autem puris ea est mixtio, ut more lymphae a lymphaticis vasis fugi facillime possit. Novimus enim, illius particulas lymphaticas, inflammatoria febre mutatas, coctas, per vasorum tunicas earumque poros, quos distentio effinxit, in cellulis depositas et ad resorptionem hac ex causa maxime idoneas esse. Cuius rei exemplum in metastasi lactis est. Vix enim abscessus est, cuius pus, nisi tumor mature aperiatur, velocius resorbeatur, quam eius, quem lactis decubitus peperit; unde, si illud resorptum ad interiora viscera et tenera organa, quae molestiam eius diu ferre nequeunt et quorsum auxiliatrice manu pervenire non possis, vertitur, ingens imminet periculum. Variolarum pus non ab aliis quam lymphaticis vasis inhalari vix negabit, qui cognoverit, glandulas axillares aliasque morbo superato infarctas saepius inveniri, easque brevi post inflammar et exulcerari solere. Eadem vasa in viscerum vomitis introitum regredienti puri praebere, pus, quod in phthysicorum pulmonum lymphaticis vasis Cl. MASCAGNI invenit; satis superque docere videtur z). Dirissimus ille morbus, mammae carcinoma feminis, etiamsi exstirpationem mammae, mole et foedo ichore praegrantis, mira quadam animi constantia et firmitate sustinuerint, tamen, cum acerrimae particulae et subtilitate maxime nocentes lymphaticis canalibus resorptae sint, saepissime exitum affert. Vidi enim nuper, carcinomaticam materiam, licet fonticulis ad brachia ab interioribus avocata et humores huiusmodi medicamentis, quae acrimoniam demulcent, correcti essent, anno tamen post ab exstirpatione mammae facta, ad abdomen conversam, vel uterum vel glandulas mesaraicas vel utrasque partes invasisse, iisque funestas obstructions attulisse. Est enim is malignus huius morbi mos, ut, si in mammis confederit, etiam saepissime uterum glandulasque mesenterii in mali societatem trahat. Hanc vero e cavo carcinomatico resorptionem in mammis vasis lymphaticis fieri, ea, quae axillaribus glandulis accidunt, indicant, quas scimus, morbo inveterato, intumescere et dolere. Qui cacoethicis et cariosis ossium exulcerationibus, spina ventosa et paedarthrocace laborant, in iis ichorosa materies; ab istis vasis resorpta, gelatinosam sanguinis et reliquorum humorum mixtionem ita corrumpit, ut, febricula ab acri excitata, saepissime vires lente consumantur. Cum enim in his malis glandulae axillarum durae reperiuntur, opinione non fallimur, humores perversos et inhalatos ad vasculosam earum telam adductos esse.

§. X.

z) l. c. p. 6.

§. X.

Resorptio impedita.

Tam late autem resorptionis vis patet, ut solidae etiam corporis partes et ipsa ossa e locis suis pedetentim in flumen humorum, tanquam in gremium, unde provenerant, recipiantur. Rubia tinctorum, quae ossa alieno colore tinxerat, si victui animantis bruti nihil eius amplius admiscetur, relictis ossium laminis et cavernis resorptione loco recedit et rubelli coloris locum is, qui ossibus naturalis est, recipit a). Illustrant etiam hanc opinionem non solum emollita ossa, quorum duram compagem acris lymphæ infirmam laxamque reddidit, sed cariosi etiam ulceris erosi ossis ruinae, quae lymphaticis vasibus resorbentur b). Alias praeter ossa solidas partes in circulum humorum sensim reassumi, idque variis earum morbis declarari MONROUS docuit c). Molliorum enim partium quo laxior est structura, eo facilius illae, cum ob levem cohaesionem particulae earum facile e fibris extricentur et orificiis inhalantibus applicentur, fugi rursus possunt; quae inprimis glandularum variarum in provectiore aetate, in qua corpori plus demitur, quam additur, thymi, et mesaraicarum ac suprarenalium decrementum ita illustrat, ut vix sit, qui de iis dubitare possit. Neque tamen in his demonstrandis longus esse possum, causas impeditae resorptionis breviter et ita enarraturus, ut, omissis iis, quae de lentore et acrimonia humorum dici possent, eas solas, quae in canalibus ipsis existunt, attingam. Haerent autem chylus et lymphæ, si vasa vel laxa, vel stricta sunt, vel, si quid iis fluidis itineris libertatem intercipit. Nam cum, quae fugenda sunt, non nisi aperto et hiante orificio suscipiantur, laxa vero vasa iusto rigore careant, collectus humor flacciditate osculi a communione reliquorum humorum excluditur, et, quorsum locus concessus est, eo diffugere cogitur. Non minor culpa in rigorem nimium cadit: plerumque enim stricti canales accessuris particulis propter nimiam angustiam introitum non praebent. In utroque vero vitio tanta partes carent irritabilitate, quanta eas, si attractio in eas cadere debet, praeditas esse oportere alio loco demonstravi d). Efficacissima causa compressio est. Qui ad plexus lymphaticos Tabula II. depictos attentionem vel levem dirigit, is, quae in gravidis oedematis pedum ultimo gestationis tempore causa sit facile cognoscet, eamque non aliunde, quam ab utero, lymphaticos truncos et glandulas comprimente, petendam esse sponte largietur. Veluti enim ab utero, si is, crescente eius mole, e pelvi in mediam abdominis partem assurgit et intestina in angusta spatia cogit, postea vero et tempore partui proximo in pelvim profundius descendit, venae iliacae comprimuntur, ut in partibus pelvis exterioribus et cruribus varices oboriantur, sic vasa lymphatica cogi et oedema inferiorum artuum a plexibus lymphaticis compressis derivandum esse, observationum mearum ratio me credere iubet. Eadem de obstructis visceribus et glandulis conglobatis omnibusque illis, quibus infarctus vasorum lymphæ oriri potest, valent. His enim cunctis causis impeditur, quo minus fugendo liquor ad proximum receptaculum accessus comparetur.

§. XI.

a) Hoc ex experimentis Clarissimi du HAMMEL fluit, qui vidit in animalibus quorum alimentis rubiam tinctorum addiderat, durissimas ossium partes et cretaceis particulis maxime refertas prae ceteris rubuisse. Vid. Cl. CRUIKSHANK, l. c. pag. 37.

b) Vid. Cl. SHELDON. l. c. pag. 29.

c) *Observations on the structure and funct. of the nervous system*, Chap. 5. pag. 17. 18.

d) §. 3.

§. XI.

Hydrops, resorptionis impeditae symptoma.

Resorptionis impeditae gravissima sunt symptomata, inter quae, si chylum spectes, passio coeliaca, sin lymphan; hydrops praecipue pertinet. Quodsi enim humores serosolymphatici in contextu celluloso subcutaneo variarum partium haerent, non solum faciei, manuum, pedumque oedematis causa existunt, sed, cum propter nimiam copiam cellulas, vel folliculos minores, distendant, et saepe spissescant, hydatides etiam, melicerides, aliosque tumores cysticos et in contextu celluloso capitis subcutaneo hydrocephalum externum progignunt. Si universalis contextus cellulosus sub cute turget, leucophlegmatia aegrum male habet et gravior, quae ad musculos pertinet, feri collectio anasarcam efficit. In contextu celluloso musculorum et viscerum si haerēt humor, his dispositionem laxam infert, illos vero acrimonia vellicat et dolorem in iis excitat. In cranio et cerebro accumulatus serosus latex hydrocephalum internum effingit, infantum ossa capitis, laxatis fontanellis, distendit et ossificationem eorum impedit; in canali vertebrali inclusus vertebrarum osseas partes nondum inter se unitas, imprimis arcuum vertebrarum officula, dispellit et spinam bifidam, perniciosum morbum, efficit. Pectoris et abdominis cava a sero collecto ipsa opulentur; vel cystides magnae, non raro ruptura vel nimia distensione exitiosae, in iis continentur. Causis horum malorum remedia accommodanda esse sponte patet; hoc addere liceat, acria, cum nervosas partes stimulent, propterea resorptionem humorum reddere, quoniam stimulo, quem nervosis partibus imprimunt, etiam vasorum lymphaticorum irritabilitatem excitant, et dum excretionem alicuius liquidi in partibus a loco feri collecti remotis augeant, suctionem lymphae brevi tempore restaurare: hinc vomitus, vel a natura ipsa, vel arte, excitatus interdum resorptionem celerem feri reddit. In puero, qui, cum scarlatina decumberet, hydrope scroti erat affectus, vidi vomitum, sponte ortum, una nocte scroti oedema resolvisse, et, cum resorpta cerebrum petere visa essent, cathartica aegro opem tulisse. Nam cum purgantia eodem modo, quo emetica sensiles partes adeoque lymphaticos canales irritent, non minor iis, quam emeticis ad suctionem humorum adjuvandam vis est ac efficacia, eaque, si viribus aegroti sint accommodata, intra breve tempus magnam feri resorpti copiam e corpore subducunt. In eligendis autem eiusmodi stimulantibus, emeticis scilicet atque purgantibus, medicamentis non parva spectatur medici prudentia, cum ex levamine aegroti et aliquo modo restaurata resorptione colligendum sit, utrum parvam eiusmodi stimulantium an magnam dosin suadere praestet. Experientia enim docuit, emetica aeque ac purgantia, si parva eorum dosis intra breviora temporis intervalla fuerit ab aegroto sumpta, cum in multis diuresin excitent, non raro plurimum auxilii mitigato stimulo attulisse. Ut autem unicuique sua est idiosyncrasia et corporis propria irritabilitas, ita etiam in variis hominibus lymphaticum vasorum genus vario modo et nunc citius nunc tardius stimulis excitatur. In nonnullis enim solus tartari cremor vasis istis stimulum eum indidit, ut serum inhalarent; aliis, quos neque scilla neque mercurius dulcis iuvare potuit, salia alcalina profuerunt; quae res docet, etiam in iis, quae diaphoresi in eo morbo opem ferunt, adhibendis selectum habendum esse.

esse. Horum autem medicamentorum efficacia iis egregie augetur, quae corpus corroborant, adeo ut, si mali causa in laxitate vasorum sola versetur, veluti post diuturnos morbos, quibus fractae sunt corporis vires, a motu, frictione, fasciis quoque, et cortice peruviano plurimum levaminis aeger accipiat; haec enim non solum lymphaticis vasis ipsis elaterem iustum, sine quo resorptionem, ut par est, fieri non posse demonstravi, reddunt, sed etiam, dum visceribus et vasis robur conciliant, functiones eorum iuvant et nutritionem cum partium refectione restaurant. Qui eo morbo affectus parco utitur potu, is tum eam ob causam, quoniam pabulum ei non subministrat et feri impetuosam effusionem impedit, tum etiam, quia hic humor extra vasa haerens facile rursus inhalari potest, bene sibi consulunt; et apud MONROUM eorum extant exempla, qui, cum a multo potu, quantum potuerunt, sibi temperassent, morbo facile liberati sunt.

Iam igitur haec sunt, quae ex meis experimentis repetenda esse credidi, quaeque, cum progressum systematis lymphatici inde ab extremis corporis limitibus usque ad interiora eius monstrent et non solum originem extremarum vasorum lymphaticorum radicum, sed eorundem etiam communem in ductum thoracicum finem huiusque cum vena subclavia connexionem contineant, utilitate quadam Lectoribus placitura esse non temere spero. Certe nonnulla, ut opinor, ex his colligi poterunt, quae ut variis, quae in sano corpore eveniunt, lucem affundunt, ita causas variorum gravissimorum malorum dilucide declarant et in proximam remedia iis opponendi viam nos inducunt. Atque non lymphae tantum varia vitia, sed ipsam etiam sanguinis crasim externis et inhalanti parti applicatis remediis corrigi, praeter illa, quae quasi sunt specifica et peculiari acrimoniae opposita, balnea probant, iis, quos atrabilaria sanguinis et humorum mixtio male habet, utilissima. Symptomata enim gravissima, sanguine per resorptas aquae particulas diluto, cessare et corpus mentemque eiusmodi aegrorum quasi recreari, eos, qui medicinam faciunt, fugere non potest.

ICONUM EXPLICATIO.

ICON I.

Figura I. conspectum præbet cutis faciei et labiorum oris. Utrorumque epidermis detracta est et villi sive fasciculi vasorum absorbentium labiorum repræsentantur, microscopio conspecti.

Figura II. refert partem cellulofocutaneam finistri femoris ex cadavere feminino infra ligamentum Pupartii collocatam cum glandulis nonnullis inguinalibus vasisque lymphaticis hydrargyro repletis.

- A. A. Cutis a contextu celluloso subcutaneo caute separata et pudendum versus reclinata.
- B. B. Contextus cellulofus subcutaneus, qualis proxime sub cute apparet; paucis locis strata tenuia cellularia demta sunt ut glandulae appareant.
- C. Glandula inguinalis transversim oblonga ligamento Pupartii assidens, e qua vasa lymphatica sub hoc ligamento iuxta vasorum cruralium tractum in abdomen intrant.
- c. Glandula inguinalis minor et exterior.
- D. Alia glandula, a qua, ut ipsa plane appareat, stratum pingue cellulofum remotum est.
- E. Alia e longitudine oblonga inguinalis, a qua cellulosa subcutanea remota est, ut nexus eius cum lymphaticis vasis oculis offeratur. Haec aequae, ac duae superiores, furculis quamplurimis turget hydrargyro repletis.
- f. Truncus vasis lymphatici semiprofundi inter cellulofum contextum et fasciam latam femoris ascendens et in Glandulam E. insertus.
- g. Similis truncus, qui ascensurus a latere ramum paullo maiorem in glandulam E. immittit et postea loco superiore per contextum cellulofum cutim versus remotum in duos dividitur ramos, quorum interior glandulam D. sub contextu celluloso petit, interior ad aliam glandulam ascendit; contextu celluloso adhuc tectam.
- h. Truncus vasis lymphatici inter cutim et contextum cellulofum ascendens a latere femoris paululum interiore, a quo continuatum vas resectum est.
- J. Vas lymphaticum subcutaneum a trunco h. resectum et cum cute reclinatum.
- k. Locus, ubi hoc vas propius cum cute unitur et a tela cutis non amplius separari poterat, quin ipsa interior tela cutis esset dilacerata.
- l. Ramus e trunco J. enatus et sub cute in loco λ. cum trunco eodem J. rursus unitus.
- m. Alius subcutaneus ramus tres furculos lymphaticos cutis decussans in ramum l. insertus.
- n. n. Vascula cutanea cuti inserta, e quibus globuli mercuriales in cutem altius penetrarunt.
- v. v. v. v. Vascula lymphatica cutanea absorbentia altiori globulorum mercurii in cutim ingressu conspicua reddita.
- o. Vas cutaneum e trunco J. enatum.
- p. p. p. Vascula cutanea lymphatica absorbentia in tres trunculos collecta, qui in vas cutaneum o. inferuntur.
- q. Vas cutaneum cum trunco J. superiore loco coniunctum.
- e. e. e. e. Surculi cutanei lymphatici absorbentes et rete formantes.
- r. r. Duo trunculi, in quos furculi e. e. e. e. colliguntur et qui a ramo q. suscipiuntur.
- s. Locus, ubi truncus J. e cute in contextum cellularem redit.
- t. Continuatus truncus J. inter cutem et contextum cellulofum ascendens.
- u. confluit cum vase lymphatico subcutaneo sive cellulosi contextus sublimi μ.
- v. suscipit aliud subcutaneum lymphaticum d.
- x. anastomosis init cum vase subcutaneo y, quod a glandula D. ad glandulam transversim oblongam C. ascendit.
- z. Truncus vasis J. in glandulam C. insertus.
- z. z. Vas lymphaticum subcutaneum e tela cellulosa ortum et in glandulam c. exteriore loco insertum.
- α. α. Limbus cutis femur versus paululum inclinat.

ICON II.

ICON II.

Trunci inferior pars a superiore resecta, in qua ascensus vasorum lymphaticorum ab artubus inferioribus, plexus eorum in pelvi et progressus ante vertebrae lumbares ad locum eum, quo cum cisterna lumbari sive ductus thoracici principio coniunguntur, demonstrantur. Tota haec pars leviter in finistrum cadaveris latus inclinata est, ut plexus lymphatici tractusque lymphaticorum vasorum finistri lateris plane appareant.

- A. Vertebra dorsalis undecima.
- B. B. Costa undecima cuiuslibet lateris.
- C. C. Musculi quadrati lumborum.
- D. D. Psoas utriusque lateris.
- E. E. Iliaci interni.
- F. Arteria aorta infra arteriam mesentericam superiorem a trunco arterioso resecta.
- G. Vena cava brevi ante divisionem suam resecta.
- H. Crus diaphragmatis dextrum extrorsum reclinatum.
- J. Crus diaphragmatis finistrum extrorsum reclinatum.
- K. Os sacrum.
- L. Arteria sacralis media.
- M. Arteria iliaca sinistra.
- N. Vena iliaca sinistra.
- O. Arteria iliaca sinistra externa nonnihil exteriora versus tracta, ut cuncta facile appareant.
- P. Arteria iliaca sinistra interna.
- Q. Arteria pudenda communis sinistra.
- R. Nervus obturatorius.
- S. S. Femora ad duarum spithamarum longitudinem infra pelvim transversim dissecta.
- T. Cutis femoris dextri.
- U. Cutis femoris sinistri.
- W. Pars fasciae latae cum ligamento Pupartii resecta et reclinata, ut vasa lymphatica, quae sub fascia lata a latere vasorum cruralium in pelvim intrant, conspiciantur.
- X. X. Fascia lata.
- Y. Ligamentum Pupartii.
- Z. Vena saphena.
- a. a. a. a. Glandulae inguinales inferiores, in quas vasa lymphatica ascendunt intrant.
- b. b. b. b. b. Glandulae inguinales superiores et ligamento Pupartii affidentes, quarum aliae interiores sunt, aliae exteriores.
- c. c. c. Lymphatica vasa superficialia ab anteriore et interiore femoris regione ascendunt.
- * * *. Lymphatica profunda dextri femoris per anastomosis superficialium repleta.
- * *. Vasa lymphatica, quae a cute et contextu celluloso inguinali in superficialia ascendunt inferuntur.
- d. Truncus vasis lymphatici superficialis, a quo truncus J. (ic. I. fig. 2.) subcutaneus resectus et cap. 2. descriptus est.
- e. Truncus continuatus vasis J. lymphatici subcutanei, resecti et icone II. repraesentati.
- f. Margo iliopuberalis pelvis, ante quem communis tendo psoae et iliaci interni cum vasis sanguiferis cruralibus descendit.
- g. Particula ligamenti Fallopii dissecti.
- h. Trunci lymphatici decem interni.
- i. Trunci externi.
- k. Vasa lymphatica interna sive quae a glandulis inguinalibus interioribus ad pelvim descendunt.
- l. Vasa lymphatica externa sive quae ab exterioribus glandulis e longitudine arteriae iliacae externae per pelvim ascendunt.
- m. m. m. Glandulae, quas utraque vasa pervadunt.

- n. Plexus lymphaticus obturatorius, quem formant
o. trunci lymphatici, qui ab interioribus lymphaticis ab interna regione nervi vasorumque obturatoriorum circumflectuntur et cum truncis istis coniunguntur, qui ab exterioribus lymphaticis vasis inter venam et arteriam iliacam externam et exteriore huius arteriae loco (Ic. IV. fig. 3.) in pelvim venerunt.
p. Ansa lymphatica nervi obturatorii.
q. Plexus ischiadicus; is profundiore pelvis loco a latere interno spinae ischii collocatus est et tela vasculofoglandulosa compositus.
r. Vasa, quae ex obtutorio plexu eiusque ansa in hunc plexum demittuntur.
s. Locus plexus ischiadici, quo vasa lymphadica per incisuram ischiadicam magnam a regione glutaeorum in pelvim et in hunc plexum inferuntur.
t. Truncus maior a plexu isto ad plexum iliacum internum ascendens; alios arteria hypogastrica tegit.
u. Truncus lymphaticus a latere interiore arteriae iliacae et super eam ad lumbarem plexum ascendens.
v. Truncus similis ad plexum hypogastricum ascendens.
w. w. Plexus iliacus internus.
x. Vasa lymphatica ab exterioribus truncis et glandulis nata et trans arteriam venamque iliacam externam in plexum iliacum internum inserta.
y. Vasa, qua directe e longitudine arteriae iliacae externae ad angulum pelvis sacroiliacum et glandulas lumbares ascendunt; horum pars cum plexu iliaco interno connectitur.
z. Plexus hypogastricus.
α. Vasa quae ex ischiadico plexu in hypogastricum intrant.
β. Vasa, quae a tergo arteriae et venae iliacae ab exterioribus lymphaticis et plexu iliaco externo (Ic. III. fig. 2.) in hypogastricum intrant.
γ. Rami lymphatici, qui ante vasa iliaca ad hunc plexum introrsum et os sacrum versus diriguntur.
δ. Trunci lymphatici tres quatuorve, qui ante truncum aortae divisae venaeque cavae per glandulas ad principium ductus thoracici ascendunt.
ζ. ζ. Vasa lymphatica exteriora e plexu hypogastrico nata et in plexus lumbares inserta.
η. η. Plexus glanduloso vasculosi lumbares.
θ. θ. Glandulae lymphaticis vasis ante vasa sanguifera maiora interiectae, quas multa vasa lymphatica, quae ad ductum thoracicum iter dirigunt, pervadunt.
ι. ι. Duo maiores trunci, qui ex his ascendentibus vasis nati ad formandum principium ductus thoracici confluant.
κ. κ. Duo alii trunci, qui a plexibus lumbaribus in augendum ductum thoracicum ascendunt.
λ. Cisterna lumbaris sive ductus thoracici principium ante primae secundaeque vertebrae lumbaris corpora positum.
μ. Ductus thoracicus ante corpora vertebrae duodecimae et undecimae dorsalis ascendens.

ICON III.

Figura I. partem spinae dorfi refert a vertebra ultima cervicali et undecima dorsali resectam; eadem figura ostenditur quo modo ductus thoracicus per pectus ad venam subclaviam ascendat et iunctus cum vasis lymphaticis brachii sinistri in eam finiatur.

- a. Prima vertebra dorsalis.
b. b. Decima.
c. c. c. Partes costarum decem superiorum vertebrae annexae.
d. d. d. Musculi intercostales interni.
e. Vena subclavia sinistra.
f. Vena iugularis externa.
g. Vena subclavia antrorsum dextrorsumque reclinata.
h. Angulus vena iugulari externa et subclavia sinistra interceptus.
i. Glandula axillaris paullo maior.
k. Tres glandulae axillares.
l. Similis glandula.

- m. m. m. m. m. Quinque trunci brachiales, qui facto antea plexu glandulam axillarem sub axillis intrant.
- n. n. Vasa lymphatica egredientia ex ea glandula et aliis venae subclaviae propioribus inserta.
- o. Trunci lymphatici duo maiores in arcum ductus thoracici inserti.
- p. Ductus thoracicus ante corpora vertebrarum dorsalium ascendens; apparent tres eiusdem infusulae et una replicatio.
- q. Flexio eius ad latus sinistrum.
- r. Arcus eius in loco suae insertionis.
- s. Locus, quo ductus is in venam subclavianam sinistram susceptis truncis lymphaticis brachialibus finitur.

Figura II. arteriam venamque iliacam externam continet e cadavere exsectam et ad anteriora pelvis versam, ut vasa lymphatica, quae inter haec vasa et psoam intersunt, conspiciantur: Magnitudo figurae magnitudini naturali respondet.

- a. a. Arteria iliaca externa.
- b. b. Vena similis exteriora versus paullisper tracta.
- c. c. c. c. Plexus iliacus externus.
- d. d. Unus e truncis lymphaticis, qui e glandulis exterioribus inguinalibus directe e longitudine arteriae iliacae externae ad plexum lymphaticum lumbarem ascendit.
- e. e. Surculi qui ex hoc trunco in plexum iliacum externum immittuntur.
- f. Truncus lymphaticus, qui ab exterioribus in latere exteriori arteriae iliacae externae ad plexum iliacum externum dirigitur, ibique cum vasis a plexu obturatorio eiusque ansa enatis anastomosi connectitur.
- g. Surculus ex plexu obturatorio circum iliacam venam flexus et in plexum iliacum externum insertus.
- h. h. Glandulae lumbares, quae vasa tum huius plexus, tum nonnulla vasa plexus iliaci interni suscipiunt.
- i. Trunci quatuor, qui susceptis his vasis ad plexum lumbarem lymphaticum diriguntur et in eum inferuntur.

I C O N . I V .

Intestinum ieiunum cum vasis sanguiferis et lacteis.

- a. a. Mesenterium, cuius altera et superior lamina remota est relicta inferiore; apparent glandulae conglobatae, quas vocant, primi, secundi et tertii generis, arteriae, venae et vasa lactea.
- b. b. b. b. glandulae primi generis.
- c. c. c. glandulae secundi generis.
- d. d. glandulae tertii generis.
- e. Arteria mesaraica superior cum ramis mesaraicis istisque qui ad intestinorum tunicas dividuntur.
- f. Vena mesaraica magna.
- g. Arteria parva, quae glandulam intrat.
- h. Venula e glandula egrediens.
- i. i. Arcus paullo longior et ovalis vasorum lacteorum.
- k. k. k. k. k. Vasa lactea ex intestino incipientia et intra ipsas intestinorum tunicas valvulosa; directio eorum differt ab illa, quae vasorum sanguiferorum est; saepius vasa sanguifera transversim decussant. Vasa lactea in truncos dividuntur, quorum alii primi, alii secundi, nonnulli tertii generis glandulas mesaraicas intrant.
- l. l. l. Trunci, qui ad formandum principium ductus thoracici confluent.

Tab.

I.




Fig.

I.


Fig. II.



Ad nat. delin. et sculpf. N. J. L. Fischer, in Theat. Anat. Lips. Prefect.

Tab.

II.



Ad nat. del. et sculp. N. Joh. Leonh. Fischer in Theatr. Anat. Prof.



Tab.

III.





Fig. I.

Fig. II.





Handwritten notes in the bottom left corner, possibly including a date and a signature.



